

Lufunjisho lwa pa bademona

Kibese kya Bupopweshi

♪ Nakumya kana baanga bayuka yuwe lwimbo mucheche, byo Mbena kwi mwimuna na lwimu lwawama lwa lumvwang'ano lwa Bwinakilishitu ne butemwe bwa Kilishitu leelo, baanga bayuka yuwe lwimbo mucheche, "Aye Wakuta Muchima Obewa"? Anweba mwamuyuka nyi? Kijitu bulongo, twayai tumone kana twikitambula. Obewa wamuyuka, nyenga? Mwayuka nyi? Pano:

Aye wakuta muchima,
Aye wakuta muchima;
Kupita mu juba jasama nangwa kivule,
Aye wakuta muchima.

Oo, akyo kyawama. Twayai pano tweseke ne jikwabo.

Aye wakuta muchima,
Aye wakuta muchima;
Kupita mu juba jasama nangwa kivule,
Aye wakuta muchima.

[Kafwapo bijipo pa tepu ne—Waku.]

² Taata Wetu wa Mwiulu, twi musachila Anweba pakuyuka mba Anweba mwituta muchima kabiji mwamwesha butemwe Bwenu kwi atweba, kyakuuba mba Anweba mwatumine Yenka Wenu Mwaana watemwikwa, ku...wabula mambo Mwaana wakwa Lesa, amba atole kifulo kya bazhatwa bandengamambo. Byo twimusachila Anweba, amba Anweba mwituta muchima kabiji mwajinga betuta muchima, pakuuba mba mube kikye! Kabiji twaikala bakusata bingi, Nkambo. Tuji bingi na lusekelo pa kupwila kuno mabaanga ano, mu kifutele kya mwiulu, kabiji twalomba mapesho Enu pa kuno kupwila. Kiswishi, Nkambo, mba yense mwanamulume, mwanamukazhi, nsongwalume nangwa nsongwakazhi uji muno, atwele mu kufunda byazhika bya mu Binembelo. Twatalang'ana na ntanda itangijilwa na Satana. Kabiji, Taata, twalomba, byo tubena kufunda bulume bwa bademona ne byo booba mu bantu, amba Anweba mwitupe lwitabilo lukatampe, kabiji lekai biyukilo byavula ne byakukumya byubiwe. Mambo, twalomba mwi Kilishitu mu Jizhina kabiji ku lukumo lwa Lesa. Amena.

³ Atweba, mu kufunda mabaanga ano, bukiji bukiji kuyamo, Nalanguluka mba, pepi nobe mamineti fifitiini bukiji. Tukijitu pa *Lufunjisho lwa bademona*.

⁴ Kabiji pano Amiwa natambula nsawakya, kimye kicheche kyapitapo; Mulongo Beeler, kufuma ku balunda nami. Kabiji Amiwa katatula mu Africa, pakachi ka Makumbikumbi. Nanchi akye kyapwisha byonse, byonse pano twibipwisha. Kabiji Mulongo Baxter kechi wakonsha kuya pa kyokya kimye ne, nanchi Amiwa nkayatu bunke ku Africa. Nanchi kuya kokwa na... lekai... Anweba ndombeshaipo, amba aye Nkambo ankakwashe, mambo Amiwa kine mbena kwikikeba ponkapano, monka mukachi ka... Amiwa naketekela pepi nobe bantu tuu aduleendi sauzande mu kokwa kupwila.

⁵ Kabiji Amiwa nji na kimonwa kyanembwa papo. Nasaka anweba bantu mu mwenemo mu kikye. Kyamwekele mu Kuvumbi. Najinga mu kibamba lukeelo lumo kimye awa Malaika wa Nkambo po aishile. Ami... Mwamona, byo Najinga kokwa, Amiwa kechi nakojejile Lesa ne, kabiji Nakolelwe mwalo wa ameba. Muntu yense wayuka—wayuka mwalo wa ameba byo aji, kakishi katwela... pepitu ku kwipaya. Kabiji mambo Naubile kintu kimo Lesa kyo ambujiile mba kechi ngube ne. Baanga baumvwa jishimikila ja kikye? Naketekela mba anweba bamu muji muno. Nayuka mba balunda bafuma ku tabbanako baumvwine jishimikila ja byamwekele. Lesa wambujile kuya ku mpuzha, ne kubula kuyako ku *iye* mpuzha, ne kubwela kuya ku mpuzha ikwabo. Kabiji Amiwa nalekele basapwishi bang'ambila mba mbule kwikyuba. Bino, basapwishi bawama, kabiji balongo bami, bino kyafwainwa kuta muchima ku byakubuula Lesa. Abyo ibyo. Mwamona? Anweba mujitu na mwingilo umo.

⁶ Baanga bavuluka kimye kimo kwajinga bangauzhi babiji mu Baibolo? Kabiji umo mwi abo, Nkambo wamubuujile, amba, "Yanga ku *imo* mpuzha. Kabiji obewa kechi—obewa kechi wakonsha kwiya... Obewa ubwelele mujishinda jikwabo," ne bikwabotu. Kabiji—kabiji waambile mba, "Kechi ukaje nangwa kutoma kimye kyo uji kokwa ne."

⁷ Kabiji mukwabo ngauzhi wakine wamusambakene, ne kwamba mba, "Aye Nkambo wasambakene panyuma Aye byo akusambakene." Kabiji waambile mba, "Twaya ku nzubo yami." Kabiji ngauzhi wakojejile monka mwaambijile mukwabo, kabiji waonawine bumi bwani na kyokyo. Monai, obewa wafwainwa kuuba byakubuula Lesa nangwa bantu bakwabo bambe byepi.

⁸ Pano tuji mu... Mu kikye kimwesho, Aye... Kyambushishe amiwa, pa satiini wa Kainyai... nangwa wa Kuvumbi. Kabiji—kabiji byo Naikeli ku lubaji lwa mwanya wami, Nakuminyenga lutwe lwa bumi bwami byo bukekala. Ami... Byo Nabwelele kuno, benengezhe nkutaya mu nzubo ya bilongolo, bishi byankwachile. Kabiji abo bampeselepesele byo Nabwelele mu ino ntanda. Kabiji, monka mu lusa lwa Lesa, bandekele kuya ku nzubo, mambo byajinga byapalang'enamo. Kabiji Amiwa

nalombele, kabiji Naile ku booba bamwingilo, Naambile mba, “Aye Nkambo wambujile mba kechi uye mujoja jishinda ne.”

Waambile mba, “Oo, Lesa wamba ne ku bantu bakwabo.”

⁹ Naambile mba, “Kola wajinga na yeo mulanguluko kimye kimo.” Kabiji nanchi, Naile na kutola mabula ne kwi abika ku maulu abo, kabiji Naambile mba, “Vulukai, mu Jizhina ja Nkambo, inge tukaye mululwe lwendo, kafwako kikobiwa ne, kabiji atweba bonse tukalipila pa kikye.” Kabiji kine twauble! Oo, ami! Atweba bonse twashitukafwe. Nanchi pano byo twabwelele . . .

¹⁰ Kuji bintu byavula bingi byakupitamo mu byobya byaalo. Nobe kyakumwenako, lubalebale mucheche wakonsha ku kusuma, wakonsha kukulengela kwikala na kikola kya mashika. Kabiji aka kakitu kacheche, inge kakusuma, inge waumvwa kubabana, kechi wakonsha kwikawanya ne. Talai, inge kakitu kafita, kechi mwakonsha kwi kafumyapo ne. Kanji na kamutwe kacheche, kasumana kupita mu kikoba, kaluka kazhokoloka *bibye* ne kukwachisha akokane. Inge wikandoosapo, wakonsha kuyokwelapo mutwe. Kaji na vailasi mukachi kako, kakonsha kukulengela kwikala nakalepu. Nanchi aye . . . Kechi wakonsha kwikawanya ne, nangwa ku muyokolapo ne; watolatu manyi. Kabiji kapemena mu nyuma yanko. Waitulwilapo manyi ponka, apa bino kafumapo.

¹¹ Kabiji kuji lubwibwi mucheche. Aye kechi uba kyongo nangwa pachechetu ne. Aye wiyatmu mwela, ufikatu [Mulongo Branham wapuma mu kuboko kwanji—Waku.] waikala pe obewa, kyo kyonka, watambula kikola kya malelya.

¹² Kabiji—kabiji kuji kyo batela mba muloolo wankokola. Inge wakusuma, wikalatu pepi nobe mamineti abiji panyuma ya kukusuma.

¹³ Kabiji kuji ne nkokola wa kibobo. Obewa wikalatu pepi nobe mamineti fifitiini panyuma ya kukusuma. Kabiji umo wafwenyenye bingi pepi na mwanami, wafwaijilwe kubika kuboko kwanji pa mutwe wanji. Wajingatu winengezha, kuuba mba asumane, kasa tukyangye kumuloza, byonkabya.

¹⁴ Kabiji kuji ne kishipila ufita. Oo, kujitu byonse! Kabiji ne bijanyi bya mungye bya banyama, byonkabyo, babokwe, kizumbuzumbu, ne bisupa, kabiji ne bintu byonse byakukumanya, monka mungye. Kabiji ne bikola, akwa kuji misango yonse ya bikola.

¹⁵ Kabiji obewa wafwainwa kwibikumanya byonse inge wayako. Kufumyako byobyo, kabiji kuji ne bang’anga balubuko bakukwimena pa byonse byo uba, monai, kabiji ne byonse byakuchinachina ne bintutu bikwabo. Bino, byepi, byo kyawama kumona Nkambo yetu wibifumyapo, lubaji lonse lubiji, byobya, nanchi mwatwajila kuya kulutwe.

Kabiji aja juba Navuluka, kasa naimana ponka, kyajinga kyawama, kyaubiwe, Amiwa nkemebuula kimye kikwabo kya kupwila, mambo Nakeba kutwajijila na mutwe mabaanga ano, wa *Lufunjisho lwa bademonia*.

¹⁶ Pano bino, kabiji kikye ne kilangulukilenga Amiwa, byo naikeli byobya, mpelo ikekala byepi? Kabiji pa kubwela kukilang'anya kalunga, Nayuka twajinga na baitabijile pepi nobe aduleendi sauzande mu kimye kyo twajinga kokwa. Kabiji mukulumpe Mulongo Bosworth waishile kwi ami. Waambile, Naambile mba, "Kyawama, Mulongo Bosworth?"

¹⁷ Aye waambile mba, "Amiwa njibingi na lusekelo ne obewa, Mulongo Branham!" Aye waambile mba, "Obewa ujitu—ujitu mu ntendekelo ya bumi," kabiji byo aambil.

¹⁸ Naambile mba, "Kyawama, Naketekela mba kyapwa kyonse." Naambile mba, "Amiwa napita pa myaka foote. Naketekela mba Nalwa bulwi bwawama kabiji napwisha lwendo lwami."

¹⁹ Aye waambile mba, "Kupita pa myaka foote?" Waambile mba, "Najinga na yoyo myaka Amiwa kasa kyangye kwitabila." Waambile mba, "Amiwa mbena kukiyatu bulongo." Aye wailenga nakufwenya kwipi ma eite. Kabiji byo . . .

Nalangulukile mba, "Kyawama, kape akyo kiji bulongo."

²⁰ Nanchi aye waambile mba, "Ine, obewa ukijitu Branham mupya. Obewa yukatu mwakutangijila mpwijilo yobe bulongo, kabiji ne bintu byonse." Waambile mba, "Kijitu inge wakonsha kwamba mu America mujishinda jaitabilwa, na mpwijilo yabikwa bulongo, po mwakonsha kwikala sikisi nangwa milungu eiti pa mpuzha imo, kabiji mwatanchika ne kubijika konse konse," waambile mba, "wakonsha kubapo kintu kimo, bino, kabiji kya kumubila Nkambo yetu." Nanchi twayile kulutwe, na kuyatu kulutwe, nanchi kyajinga—kyajinga kyawama bingi.

²¹ Pano pakupitapo kimye, Namwene kimwesho, byo Najinga mu America, kabiji kyaishile kwi amiwa, ne kumbwezha ku Africa, kabiji kyamweshe yoya mbung'eno imo, yajinga kokwa ku Durban. Kabiji mbung'eno itanshi yatwelele mu jishimikila, kasa mbena kuya ku Muzhika. Mbung'eno ya bubiji ya mwekele, byo yaubile, yajinga yabaya kukila mbung'eno itanshi. Kabiji Aye . . . Naumvwine kujila, kabiji Malaika waishilenga kufuma Mwiulu; Wajinga na kyeya kikatampe.

²² Kabiji awa Malaika wa Nkambo wimana kulubaji lwetu kuno, waime . . . kimye kyonse wimana ku kilujo kyami, ku *lulwe* lubaji. Kabiji Waimene byobya, kabiji Wajinga—Wajinga ubena kuzhokoloka. Kabiji Namwene yuwe Mwanamulume kasa aimana mushi Yanji. Aye—Aye kechi . . . Pano, akyo kechi ke kimwesho inge mwamumona Aye ne. Kijitu pamo nobe byonka

byo mubena nkutala. Kika, obewa wakonsha Nkumumvwa kwenda ne kwamba kwi obewa. Kabiji Aye umvwe... Kintu kiji kyonse, kya kine. Kabiji kechi kimwesho ne; Mwanamulume waimana byobya nobe byonka byo uji obewa. Kabiji jiwi Janji jijitu pamo nobe jami nangwa jobe byo jafwainwa kwikala. Pakuuba kimwesho, ke kintu kikusolokela kwi obewa kabiji wikimona ne kwikimona, byonka byatu. Pakuuba awe Muntu wiyatú waimana popa.

²³ Nanchi Aye wambujile mba... kika kikamweka. Kabiji Aye waambile mba... Awe Malaika waishile, kabiji Aye wambujile mba mbwele ne kutala mu *jije* jishinda. Kabiji aye watajile ja ku India, pano. Amiwa kechi naamba mba mu India ne, bino kwipitu. Bino bajinga bantu Bamwenye.

²⁴ Mambo, bena Afrika babaya, bazama, bantu baji-nobe banema ne kununa. Bamo ba mwiabo balepa pepi nobe sebeni-futu, kabiji kupimwa, oo, tuu aduleendi eite, mapaudhi fili aduleendi, babaya. Ba Zulu, bino, ba Shunghi ne Basutos, kabiji, oo, muji mitundu yavula yapusanapusana. Kwajinga mitundu fifitiini yapusanapusana yatainweko pa joja juba, yo Naambilengako.

²⁵ Nakonsha kwamba kyambo kimo, nobe, “Yesu Kilishitu, aye Mwaana wakwa Lesa.” Nakonsha kuya na kutoma meema kasa kikyangye kupita mu bonse bakututulula ne. Umo wakonsha kwamba mba... Kabiji byongo byonse!

Nalangulukanga mba, byo Naumvwine bantu baki Pentekosito na kwaamba mujimi, kya kuuba mba kape umo waamba mu musango umo wakyongyo kabiji mukwabo waamba mu mukwabo, kyakonsha kwikala byepi mutanda? Bino Naketekela mba Baibolo uji bulongo, kabiji ne kuyuka mba Byokiji, inge Kyaamba mba, “Kechi kujipo kyongo kivuma kwakubula kilumbululo ne.” Abyo ibyo.

Bamo bakonsha kwamba mba, umo amba yanga, “Blrr blrr blrr blrr,” akyo kyalumbulula mba “Yesu Kilishitu, Mwaana wakwa Lesa.” Mukwabo umo amba yanga, “Cluk cluk cluk cluk,” awa wajinga “Yesu Kilishitu, Mwaana wakwa Lesa,” mu kitundu kyanji. Nanchi nagwa kyongo kivume mu musangoka, kiji na kilumbululo kuntu kumo. Abyo ibyo. Nangwa kikale kyongo kyamusangoka, kyalumbulula kintu kimo ku muntu umo kuntu kukwabo. Kabiji Aye byo ajinga... Bakonsha kupana kyokyo.

²⁶ Kabiji Namwene kyokya ku lubaji lwami lwa kipiko, awa Malaika byo aishile kabiji Namwene kokwa nobe-kisamba, kabiji bajinga bantu baji na... kyamwekele nobe bajinga na—nakisapi kibazhokoloka, nobe *bibye*, kabiji wipomba ne kufwa wafwa, nobe bapomba kamwaana kakacheche, jitebela. Kabiji byo kyajinga. Kabiji Nakonsheshe kumona byonka byo Nakonsha kumona, kafwako kikwabo ne bajingatu bantu. Kabiji

pano awe Malaika waambwile kyeya kikatampe kyayilenga kulutwe ne kunyuma, kabiji kyatatula kwenda kuya kulutwe ne kunyuma, nobe *byobya*. Kabiji kechi Nakimonapo bantu bavula mu bumi bwami ne!

²⁷ Kabiji awe Malaika mukwabo waishile pepi bingi kwi amiwa, kabiji Aye waambile mba, "Kuji fiili aduleendi sauzande ba mwiaabo mu kokwa kupwila." Kabiji Njinakyo kyanembwa papo. Kabiji anweba kinembai pa kipepala, pamo nobe byo Nabulang'ene pa yewa nsongwalume wa mucheche wasangukile mu Finland. Anweba nembai ku jibula ja Baibolo wenu nangwa kuntu kumo, amba mu iye mbung'eno (Kukekala mbung'eno. Kabiji anweba mu kekyumvwa kupichila mu musango umo.) bantu fili aduleendi sauzande bakatanwako ku iye mbung'eno. Pano, monai inge akyo kechi byo kiji ne. Akya kikekala bimye bisatu bukata kukila ikwabo byo yajinga. Mwamona? Fili aduleendi sauzande bantu bakatanwako ku kupwila. Kabiji Amiwa njibingi na lusekelo pa kufikako, Amiwa kechi nayuka byakuuba ne, mambo Natemwa kuleta myeo kwi Nkambo yetu.

²⁸ Kabiji kokwa, pa kimye kimo, kumona—kumona sate sauzande batunshi kwiya kwi Yesu Kilishitu mu lwito lumotu, sate sauzande batunshi.

²⁹ Pano twayai tuye ku lufunjisho lwetu bukiji bukiji. Keesha twafunjile ng'ingijilo ya bademona. Amiwa na kulangulukanga leelo, byonka Lesa byo engila. Anweba kechi mwayuka bwanabwabene byobuji pakuuba mba mufumemo ne. Pano, Amiwa kechi ne mufunjishi ne. Amiwa njitu kwalepesha kwikal mu—mufunjishi wa Baibolo. Kabiji Amiwa... Kufunda kwami kwapelelelatu mugulendi sebeni. Nanchi kokuuba mba... Kabiji, mba, Nafumine mu sukuu pepi nobe twetifaivi myaka yapita, nanchi akya ke kimye kyabaya bingi. Kabiji kechi Njipo na kufunda kwabaya ne, bino byonse byo Nayuka ke byobya Byotambula kupichila mu lutundaiko. Kabiji alwa lutundaiko kechi lwaesakena pamo na Baibolo ne, nishi kingi. Mwamona? Kyafwainwa kwikal Baibolo. Nangwa lwikale lutundaiko lwabyepi, lwafwainwa kufuma... *Akye* kyo kintendekesho kya Lesa. Kafwako kintendekesho kikwabo kya kubikako ne kana Kikye. Kabiji akye Byokiji, inge kyo Nakonsha kwamba kyafwainwa kwikal kyapusanako ku Kikye, lekai byambo byami bikale bya bubela, mambo Abwe bo Bukine. Mwamona? Kabiji inge malaika wakonsha kukubula kintu kimo kyapusanako na Kikye, Paulo waambile mba, "Lekai ekale wafingwa mafingo," pamotu ne malaika wa Kyeya. Bino, kuji bintu bikatampe bingi. Amiwa na... onkatu... Nasajile mooba abiji, mambo a kuuba mba fikizhe lulwe lufunjisho ku bantu, ajo jajinga ja keesha ne ja leelo, ja kupwila kwa mabaanga.

³⁰ Pano, ene mambo o Naubile kikye, ke kwieseka pacheche amiwa mwine pakuuba mba mone inge Lesa wakonsha

kukwasha. Pajipo kintu kimo pa muchima wami. Kabiji akye, kyo kino, panyuma ya iye Mbila ikatampe, kabiji panyuma Lesa Aye mwine washinikisha kyo Naamba kwikala Kyakine, mu Kyambo Kyanji; monka mu Kyambo Kyanji, patanshi, kabiji kupichila mu biyukilo ne byakukumya. Pano, Nalanguluka, na Mamboawama a Bukine ku Kipwilo, Amiwa njina mwingilo, kwi Lesa, kuleta kikye ku Kipwilo. Abyo ibyo. Abo baji, mu tubungwe twavula twapusapusana kabiji ne lubaji lwa kwi abanyako, poso kyaikala ke kingi. Atweba bonse twi baana bakwa Lesa umvwe twasemwa jibiji, Akyo, mwamona. Kabiji bukine bwa kikye kintu ke kuuba mba Lesa wakeba mba tuyuke kyokyo, amba twi baana Banji.

³¹ Pano, vulukai, tepo wakwa Solomoni wafumine, muntanda yonse. Kabiji kwaishile jibwe jimo jazhabakene *yuwe* musango, kabiji jibwe jimo jazhabakene *yewa* musango, kabiji jimo jachibiwa *yuwe* musango, kabiji jimo jachibiwa *yewa* musango, pakuuba, byo ayishile pamo, kechi kwajingapo nangwa soyala, nangwa kumvwanyika kupopa na sando ne, bintu byonse byafikijilemotu mu bifulo byabyo. Lesa wajinga Mufunjishi wa byobya.

³² Lesa uji na kipwilo kitelwa mba Assemblies, kabiji kikwabo mba kipwilo kya Lesa, kabiji kikwabo *bibye*, kabiji kikwabo *byobya*. Kabiji pakuuba byonse byaishila pamo, bikekala byonse ke jibumba jimo jikatampe ja butemwe bwa balongo, kabiji Lesa ukabika, ukatunga akya Kipwilo pamo ne Kwikitwala mwiulu.

³³ Kipikichala kyonse kyaya kuwa, kasa bakyangye kwikibika mu nzubo mubikwa bintu byakulengalenga ne, kyafwainwa ku kobekwa, kyafwainwa kupidwa mu nzubo ya bakajimbuluzhi, patanshi. Awa muntu walengele...?..., nangwa, ndekelaiko mambo, kechi Nakonsha kuvuluka jizhina janji ne, walengele Kijilo Kyapeleleko, nangwa byonkabyo, akya kyamusendejile bumi bwanji bonse. Aye walengele kyokya kipikichala. Kyajinga pepi nobe myaka tweti, nangwa myaka teni, Naketekela, pakachi ka kulenga Kilishitu ne Yudasa. Kabiji mwakonsha kuvuluka, mu kyokya kipikichala kyaya kuwa, yeka muntu umo walengele kya Kilishitu, myaka teni palutwe walengele kya kwa Yudasa? Abyo ibyo. Aye wikyubile. Myaka teni ya bubi, kufuma mu nyimbi waya kuwa umwesha nyimbilo yanji, watolele kifulo kya Kilishitu, waiya mu kifulo kya kwa Yudasa. Anweba kechi mwakonsha kusenda myaka teni ne. Kisendatu mamineti teni, kikooba kintu kimo kwi obewa. Kikapipula byubilo byobye, ku bubi. Bino, nangwa byonkabyo, akya kipikichala kyapichile mu bonse bakajimbuluzhi.

³⁴ Kabiji abyo byo Nalanguluka pa Kipwilo kya kwa Lesa, jibumba jaitwa. Kyawama, Amiwa kechi natazha mukuuba mba nazhingila ne. Amiwa na kilang'anya tulunga twa meema sebeni, kabiji Amiwa nji palwendo lwa busatu lwa kuzhokoloka ntanda, kabiji bantu baamba mba, "Uba kyongo-

kyazhila! Uba kyongo-kyazhila!” Kabiji Amiwa na palanguzha pantanda, kabiji Nkyangye kutanapo uba kyongo-kyazhila ne. Ajo ke jizhina diabola jo abika pa bantu. Kyo kyonka. Kechi kujipo kintu kya kuuba mba uba kyongo-kyazhila ne. Kabiji Amiwa njina kubalwa kwa bipwilo sikisi aduleendi sikisite-eiti byapusanapusana bijiko, kabiji ne byaubiwa bu kabungwe pantanda, kechi pajipo nangwa kimo kyatelwa mba Uba kyongo Kyazhila ne. Kabiji akyo ke kyafuma ku kafulumende. Kechi kujipo kimo kipwilo kya Uba kyongo Kyazhila kyo Nayuka ne. Nanchi, kyajingatu kintu kimo diabola kyo atumba. Pano, bino, mu byonse bye, byonse bye bintu, Lesa walenga kipikichala. Kabiji kimye kimo abyebipwilo bicheche byakala byaikalanga konka, anweba bam... .

³⁵ Amiwa mona baabo banabalume bamitwe-yavwi. Nsongwalume wami, keesha; Amiwa najinga mu kibamba, na kutanga, kabiji umo wamwingilo waishile nkoji ne kwamba mba, “Natemwa kupakana maboko na bashobe.” Mmabo, nsongwalume wami wakomena pamo na Mulongo Baxter ne bakwabo, abo booba, “Ine,” abyobu, bukiji bukiji. Amiwa kechi natemwa kyokyo ne. Mwamona? Nangwatu inge Na... Mambo, kechi Nakonsha kwikala kalume wa muntu ne Lesa ne, ne apo. Bino Nalanguluka mba Amiwa natemwa kupakana maboko na balongo bami. Amiwa natemwa kuuba kyokyo. Kujipo kintu kimo pa kyokyo, Amiwa natemwa kupakana maboko awa—awa mwiningilo. Kechi kanatu wamwingilo ne, bino yense mwaana wakwa Lesa, Natemwa kwikyuba. Amiwa kechi nekiyukilepo ne poso mukazhami byo ambujile palutwe kacheche. Kyawama, inge wamubujile awa wamwingilo, “Mineti umotu, uji kunyuma mu milombelo, kabiji—kabiji Nakonsha kumona aye byo akonsha kwamba.” Kyawama, akyo, akyo kyafwainwa kwikala bulongo. Nanchi Amiwa na mulungamikile pakyokyo, namba kechi wakonsha kuuba kyokyo ne. Mwamona?

³⁶ Kabiji nanchi kyakine, obewa kechi wafwainwa kuuba, nobe mulongo byo aaji kwamba pa kimye kyapita kicheche ne. Inge wauba, nanchi pa kimye kyabufuku Amiwa—Amiwa pana lujimo, mwamona. Bantu bayo nakwamba, kabiji muntu yense kape uji na misongo, kabiji umvwe batatula kwambapo pakikye, bukiji bukiji, kuji Malaika wa Nkambo ponkapatu wikibulang’ana.

³⁷ Kuji muntu umo waikala, ubena kumona ponkapano, wayuka kyokyo amba kyakine, mamineti acheche apitapo, nangwa awala umo na afu wapitapo. Inetu waikala muno, ao wabujile kuyuka byo kyajinga ne, mba Malaika wa Nkambo waambile kwi aye bufuku bukwabo kabiji ne kumubuula kintu kimo, kabiji kechi wikikwatakenye bulongo ne. Pakuuba leelo kya kubiwa, nanchi aye wayuka pano byo kyalumbulula umvwe Aye ubena kwamba ko aji. Kabiji byepi, naimene popa na kwamba nanji, Malaika wa Nkambo wabwelele kunyuma ne

kumubuula lukatazho lwanji byo luji, kabiji ne byonse byo byajinga, kabiji—kabiji ne byo alangulukilenga, kabiji umo wa batemwe banji, kabiji ne Lesa byo aambile ne kwamba mba Aye wikishinikisha, kabiji ne kyokya kikobiwa. Nanchi abyo kine ibyo byo kikekala. Mwamona? Lesa byo ekyambilé.

³⁸ Kyawama, pano, byepi bimye bicheche abyo... Pano, kabiji kimwesho kimo kikunkokesha bingi, monai. Kabiji kintu kitanshi mwayukatu, inge wafika ku kipwilo bufuku, wikalatu wapwijijika kupwamo kyakuuba mba kechi uyuka ne kyakuuba ne. Kabiji mundombeshepo pa kino kimye, mwamona, mambo kifuma kumbung'eno imo kyaya ku ikwabo, kyaya ku ikwabo. Ino yoyonka mbung'eno, yakonsha kwikala yapusanko, inge pakino kimye Nakuyanga ku nzubo kafwako kyo nakonsha kuuba pa bang'ondo bavula ne, ke kuyatu na kutola kanda kami naya na kuloba. Pakuuba Amiwa mfuma ku mbung'eno imo ne kuya ku ikwabo, kufuma ku imo ne kuya ku ikwabo, mwamona. Akyo kyo kilengela.

³⁹ Kabiji anweba bonse lombai, anweba bantu muji kunyuma mu jibumba. Bambujile bufuku bwapita amba Na—amba Naambilenga ku muntu umo, ne yewa muntu kechi wakumbwilenga ku lwito ne. Pano, akyo ke kintu kyakila bingi kutama, mwamona. Byo be kyambile... Kyawama, bimye bimo ao malaiti kechi asama ne, pají kibala kifita pakachi.

⁴⁰ Kabiji Amiwa mona Malaika wa Nkambo inge Waimana kuno, Nakonsha kwikyumvwa. Nanchi Nekyumvwa Kyafuma kwi amiwa, kabiji Amiwa ntajisha, Kifuma kwi amiwa ne Kuya kuntu kumo kabiji kyaimana popa pa kimye kicheche, kabiji Nakonsha Kwikimona. Kabiji Kibyasha kyeyá kabiji ponkapa pekala kimwesho. Pano Amiwa mona kimwesho. Amiwa mona ng'anyi musango wa muntu uji popa. Amiwa tana muntu, bino Naamba. Abyo byo kyubiwa. Abyo byo kimweka. Kechi wafwainwa kubuula muntu uji yense ne, bino akyo—akyó byo kyubiwa, mwamona. Kijitu mu kibese kya bumupashi.

⁴¹ Nanchi inge awa mutu wabula ku kumbula, kijitu pamo nobe kutanga Baibolo kuno kabiji ne kwamba, "Kafwako Kijiko ne," wafumako kwi Akyo. Mwamona? Nanchi akyá kikilengela kwikala kyatama bingi. Nanchi ikalai benengezha, babena kuteleka, ikalai babena kukuketa. Inge Aye waamba, kumbulai. Monai, inengezhai kukumbula kimye kiji kyonse.

⁴² Kabiji nanchi mukazhi wami, ne Mulongo Beeler ne bakwabo bavula, lukeelo luno, bakumbulanga pa kikye, amba kyajikwitanga muntu pa mulongo wanji, kuntu kumo, awo wajinga kintu kyatama, kabiji ne bikwabotu. Kabiji awa muntu kechi wakumbwile ku lwito ne, nanchi awa kechi wakonsha kukwashiwa ne. Akyo kiji pakachi ka Lesa ne muntu. Kimwesho byo kyafumine pe amiwa. Nanchi Amiwa kechi ne kimwene

jibiji ne, mambo kechi wakumbwile ne. Nanchi, ikalai babena kukeketa, ikalai benengezha.

⁴³ Pano kusenda lulwe lufunjisho lwa *Lufunjisho lwa pa bademona* kabiji ne kwamba pa bademona. Pano, bantu, umvwe mwaamba mba “demona,” ponkapotu batatula kulanguluka mba, “Oo, kimo kyakulengatu nangwa kintutu kimo!” Bino bademona kobaji byonka biji Bamalaika. Abo kobaji bakine.

⁴⁴ Kabiji diabola koaji byonka biji diabola wakine, byonka biji Yesu Kilishitu ye Mwaana wakwa Lesa. Aye ye diabola! Mwiulu kine nkomuji. Kabiji inge kafwako kintu kyamusango yeo mba ngehena ne, nishi kafwako kintu kiji mba Mwiulu ne. Kabiji inge kafwako mapesho Apeenape...kumanyikwa kwa Peenape, byonkabyo, kafwako mapesho a Peenape. Inge kechi kuji mute ne, kechi kuji bufuku ne. Mwamona? Bino kine monka mwaikelako mute, kuji ne bufuku. Monka—monka kine mwaikelako—kine mwaikelako Mwinakilishitu, kwafwainwa kwikala ne kafutufutu. Kine byonka byo kuji wakine wafuma kwi Lesa, kuji ne muntu umo wakupashang’anya kyokyo. Mwamona? Bijitu mumwe ne momwa, kifita ne kitoka, byayatu mu bintu byonse bijiko, kine ne bubela konse konse. Kabiji kuji ne mamboawama a bubela, kuji ne Mamboawama. Kuji Lubatizhilo lwa kine, kuji ne lubatizhilo lwa bubela. Kuji kitabila-mbijinga, kabiji kuji ne wakine. Kuji ne dola wakine Mwinamerica, kuji ne dola wabubela Mwinamerica. Kuji Mwinakilishitu wakine, kuji ne kafutufutu wakine, mwamona, akwa ke kupashang’anyatu. Nanchi mwatana kuuuba mba, byonse byendela pamo. Bino, kuuba twibyabanya ne. Lesa ye ulengela mvula kunoka.

⁴⁵ Lekai Aye andeke ng’ambe papo pacheche. Baanga basapwishi baji muno? Sutulaiko maboko enu. Konse mwazhokoloka, basapwishi, twayai tumone maboko enu. Kyawama, Lesa emupeshe, balongo. Pano, pano, anweba kechi mwakonsha kusenda kikye amba lufunjisho ne, bino, kasa tukyangye kufwenya ku lulwe lufunjisho, Amiwa nsakwimubuula kika. Baanga bantu ba ki Pentekosito baji muno? Sutulai maboko enu, kuzhokoloka konse konse. Kyawama, anweba mwi ba Pentekositi. Kijitu bulongo. Nsakwimubula kyo Najinga nakyo kimye kitanshi kyo Naishile mu kachi kenu, mu lubaji.

Amiwa najinga monka muno mu Indiana, pa mpuzha imo yatelwa mba Mishawaka. Jibumba jitanshi ja bantu ba ki Pentekosito bo Nakimwenepo, batelelwe mba ba—ba Pentecostal Assemblies ba Yesu Kilishitu, Naketekela, nangwa kintu kimo kiji byonkabyo, jibumba ja bantu bawama. Pakino kimye be bungizha pamo ne kwitela mba ba United Pentecost. Befumisheko kubakwabo bashala, mambo a lukatazho lwa lubatizhilo lwa mu meema. Akyo kechi kibalengela kwikala bakafutufutu ne. Muji Bavula bakine, bakine ba Mupashi

Wazhila, basemwa-jibiji Benakilishitu mukachi kabo. Kabiji Lesa wibapele Mupashi Wazhila kupichila mu kubatizhiwa mwi “Yesu mu Jzhina,” kabiji ne kupana kubakwabo lubatizhilo lwa Mupashi Wazhila, byo babatizhiwa mu “Taata, Mwaana, Mupashi Wazhila.” Nanchi, “Lesa wibapa Mupashi Wazhila, bamukokela Aye,” nanchi bang’anyi—bang’anyi batambwile, bonka bamukojejile Aye? Abyo byokiji.

⁴⁶ Inge anweba mwalubakotu, kabiji ne booba basaka kuya mujishinda jimo, balekai bekale, kabiji anweba yaingatu kulutwe kasa muji balongo. Kyo kyonka. Kechi...Kika kikyubile, kyajinga kwabenamo, kwabenamo. Mwamona? Kika? Kyajinga kwabenamo, kwabanapo, kwabanya bulongo, kwikalala ne kwiabanya anweba benenabene. Ine, mwane, atweba kechi twaabana ne, twi umo. Abyo ibyo.

⁴⁷ Bino byo Naimene popa, Natajilenga booba bantu. Pano, ami, ponafuminetu mu kipwilo kyakala kya kicheche kya Southern Baptist, kika, Amiwa namwene booba bantu, Natwelelemo kabiji batotelenga mapi abo, ne kubijika, “Umo wa mwiabo, umo wa mwiabo, na lusekelo Naamba mba Amiwa ne umo wa mwiabo!”

⁴⁸ Nalangulukile mba, “Ami! Yii!” Kintu kitanshi mwayukatu, ke kwiye mutu umo na kupita momwa, na kuzha nangovu bingi. “Tuh-tuh-tuh-tuh-tuh,” Nalangulukile mba, “ngubilo ya kipwilo ya byepi! Amiwa kechi nakyumvwinepo bintu bya musango yewa ne.” Natwijijiletu na kwibatala, na kuzhokoloka. Nakuminye, “Kyawama, kika mu ntanda kiji na baabo bantu?”

⁴⁹ Bino, anweba mwang’umvwapo kala ami kubulang’ana jishimikila ja bumi bwami, apo Amiwa po nafika pa iye mbung’eno. Bino akye ke kintu kimo kyo Nabula kubulang’anapo, kechi nabulang’anapo kala ne, muvula ya bantu. Nanchi abo...Pano, inge mubena kukeba kwikifumyapo pa lekonda wenu, kika, mwakonsha kuuba kyokyo. Kijitu bulongo. Pano, mu kikye Namwene, kabiji pano Nalangulukile mba, “Kyawama, abo bantu ke bantu bajji na lusekelo bingi bo Nakimonapo mu bumi bwami.” Abo kechi bajinga na buvu na bupopweshi bwabo ne. Atweba Baptist twikalako na buvu pacheche, mu kakimye kamo, mwayukatu. Mwamona? Kabiji umvwe baya na kulomba, mwayukatu, bekala kunyuma ya kileta mwela, mwayukatu. Kabiji—kabiji, bino atweba...Bino abo bantu kechi byo bajinga ne, mulongo, abo—abo bajinga na bupopweshi bonse mukachi, pangye, kabiji ponsetu.

⁵⁰ Kyawama, Navuluka abwa bufuku byo Nafikile ku pulatifomu. Waambile mba, “Bonse basapwishi bekale ku pulatifomu.” Kwajinga kupwila kwa mimba. Baikeli nako kokwa ku Kagenta kabuyeke, na mambo akuuba mba—na mambo alukatazho lwa bachiluluka, yenka muzhilo wakwa Jim Crow wa ku Kagenta kabulenge. Nanchi bonse basambakenetu

konkakwa kufuma konse konse. Nanchi, Naikeli palutwe popa. Kabiji aye waambile mba... Kyawama, pano kuji... Naumvwine bonse basapwishi kupwisha awa mute ne bufuku. Batongwele musapwishi umo mukote, aye wajinga wachiluluka mwanamulume mukote walupukile, kwajinagtu tu myevu tucheche ku mubanga wanji, nobe *byobya*, musapwishi wamvwala wakala mukukumba-wakisusu walepa, mwayukatu, teneshi wanekena, kabiji kwajinga kwakaba. Kamulanda mulongo mukote walupukile *bibye*. Aye waambile mba, "Baana bami batemwe," waambile mba, "Nakeba kwimubuula anweba," watatwile kushimuna. Amiwa najinga pepi nobe wakila bwanyike ku baikeli ku pulatifomu. Nanchi pano aye waambile mba, "Nemubuula!" Aye watolele kibaba kyanji kufuma mwi Yoba, "Wajingapi kimye kyo Naajile bintendekesho bya ntanda? Mbuule Amiwa kwepi ko bya menena."

⁵¹ Bonse basapwishi bakwabo basapwijilenga pe Kilishitu, monka mo kyubilwa kimye kyonse. Natalekele kwiabo, ne bomvwine bulongo. Bino kechi yewa nsongwalume mukote ne! Aye wabwelele kunyuma kokwa pepi nobe myaka teeni sauzande ntanda kasa ikyangye kutatula. Aye wayile Mwiulu kabiji ne kubwela pansi kuitita mu meulu, aby byamwekelenga. Abya byo basapwijilengapo, kuya kulutwe, mu kimye kya mute; aye wasapwijilenga pa byobya byaubilwenga Mwiulu. Aye wamuletele Kilishitu pa kakongolo, kubwela kunyuma kwine pantu pamo mu Peenape. Kika, aye wasapwijiletu mamineti faivi ponkapo awa mulongo mukote, Kintu kimo kyamukwachile. Aye watolokejile peulu kabiji wabwela wampukanya ne tushiko twanji pamo, ne kubijika na, "Kyongo kyalusekelo!" Aye wajinga na mpuzha yabaya byonka Byonji nayo kuno. Aye waambile mba, "Anweba kechi muji na mpuzha yabaya mponakonsha kusapwila ne," kabiji byonkabyo byo ayile.

⁵² Kyawama, Nalangulukile mba, "Inge akya kyakonsheka kubiwa ku muntu uji pepi nobe nyaka eite, kyakonsha kuuba byepi kwi amiwa? Akyo kyo Mbena kukeba. Akyo kyo Mbena kukeba."

⁵³ Pakuuba kyakwanchile amiwa kyajinga kikye. Bino, tubena kwamba pa bademonia. Kika kyakwanchile, Namwene banabalume babiji. Umo waikele ku lubaji lumo, kabiji mukwabo ku lukwabo. Kabiji inge Mupashi wapona, aba banabalume baimenenga na kwamba mu jimi ne kubijika, kabiji pakanwa paaluluka ke patoka. Kabiji Nalangulukile mba, "Oo, ami, inge Nakonsha kwikala na kyokya!" Mwamona? "Byo kyawama! Oo, akya... Natemwa kyokya!" Kyawama, Naile mu bujimi bwa mataba. Kabiji Nemubujile jishimikila jabumi bwami. Anweba mwijitanga mu buuku. Nalajile bufuku bonse. Kabiji Nabwelele lukeelo Iwalondejilepo, nanchi Nalangulukile mba Nakonsha kuperapesa. Amiwa njina jishinda ja kuuba bintu byabula kuyukapo nangwa umo ne kanatu Lesa ne

Amiwa. Nanchi, kyakuuba mba, Amiwa ntola kishipi kabiji naya na kukumanya mupashi wanji. Anweba mwikimona konka kuno ku pulatifomu. Mwamona? Kabiji nanchi pano Natatwile kwisamba na umo wa baabo banabalume. Nebamwene, baikala pamo pepi, ne kwikwata ku maboko kabiji ne kuzha ne kubijika. Nalangulukile mba, “Oo, ami, akye kyaumvwanyika bulongo kwi amiwa!”

⁵⁴ Kabiji Natolele kuboko kwanji kumo. Naambile mba, “Muji byepi, mwane?”

⁵⁵ Aye waambile mba, “Muji byepi.” Mwanamulume wawama bingi, musango-wa mwanamulume mulunda. Aye waambile mba . . .

Naambile mba, “Obe wi wamwingilo?”

Aye waambile mba, “Ine, mwane. Amiwa ne membalatu.”

⁵⁶ Kabiji Natwajijile na kwisamba nanji pacheche pakuba mba Amiwa nkwtakanye mupashi wanji. Mwamona? Aye kechi wayukile kyokyo ne. Kafwako nangwa umo wayukile ne. Amiwa kechi naambilepo kintu pa kiky ne. Myaka palutwe, Amiwa kechi ne kyambilepo ne. Nanchi abo . . . Pakuuba byo Naishile kutana, kyajinga kyakine, wajingatu walumbuluka, muntu Mwinakilishitu! Awa muntu kine wajinga wazhijikwa wakwa Lesa. Nalangulukile mba, “Mulongo, akyo kyawama.”

⁵⁷ Pakuuba kintu kyenyi, byo Nakwachile mwanamulume mukwabo, kyajinga kyapusanako. Aye waikelenga na mwanamukazhi ao wabujile kwikala mukazhaji ne. Abyo ibyo. Kabiji Namwene kyaiya kwi aye, kimwesho. Nalangulukile mba, “Oo, ami, kechi kyafwainwa kwikala byobya ne.” Kabiji awa mwanamulume . . . Nalangulukile mba, “Bino, bino, awe mupashi mukachi kabo abo bantu watama. Abyo byo byonka bijiko.”

⁵⁸ Nanchi abwa bufuku byo . . . byo twaile ku mbung’eno, kabiji ne mapesho aitulukilenga, Nakonsheshenga kulomba kwi Lesa, kabiji Mupashi Wazhila, awa Malaika wa Nkambo upana bukamonyi amba akya kyajinga Mupashi Wazhila. Kabiji Mupashi umo waponejilenga pa *yuwe* mwanamulume waponejilenga ne pa *yewa* mwanamulume. Kabiji umvwe Mupashi waituluka, bonse babiji baimana, kabiji bonse babiji babijikilenga ne kujila kabiji ne kutota Nkambo, kabiji ne kwamba mujimi ne kuzha. Naambile mba, “Ami—Ami—Amiwa kechi ne kyumvwa ne, Nkambo. Aye . . . Amiwa kechi nekimona mu Baibolo ne, apo po kyafwainwa kwikala kiji bulongo.” Bino Naambile mba, “Kapepo Amiwa najimbaikwa.” Mwamona? Naambile mba . . . Pano, kuno, Amiwa—Amiwa kechi . . . Amiwa—Amiwa ne bikonsha kuketekela mu Baibolo. Kyafwainwa kwikala Kikye. Mwamona? Naambile mba, “Nkambo, Mwayuka musango ye njimo, kabiji Na—Nafwainwa kwikimona mu Kyambo Kyenu. Kabiji Ami—Amiwa kechi na

kwatakanya ne. Kimye Mupashi Wazhila byo abena kuponena pa *yewe* muntu, aye Mupashi Wazhila ubena kuponena pa *yewa* muntu, kabiji umo wa mwiabo ke wazhijikwa kabiji mukwabo ke kafutufutu. Kabiji Nayuka namba byokiji.” Amiwa ne kiyuka. Kwakubula . . . Nafwaijilwe kutola yewa mwanamulume ne kumushinina, nangwa kumwita ponkapa ne kumubuula pa kikye.

⁵⁹ Kijitu pamo Nobe awa mwanamulume wajinga muno bufuku bwapita, kechi wajinga kintu kikwabo ne pakuuba ke—ke kipashanya, inge kwajingapo umo ke waikala popa. Kabiji Nafwaijilwe kumwita, pakuuba inge waimene ne kutatula kupachika pachika. Nanchi Amiwa ne kilekeletu kyapita, pa mambotu ampwijilo, bino Namuyukile. Ee, mwane.

Kuji umo, babiji ba mwiabo, baikala kunyuma kokwa, bufuku bukwabo, wa ku kipwilo kimo monka muno mu muzhi. Beene bakajimbuluzhi! Amiwa ne bamona. Bino, inge wakonsha, aye utatulatu makatazho. Amiwa ne kyuba bimye yavula bingi. Amiwa nebalekatu bunke bwabo, mwamona. Kijitu bulongo. Lesa wayuka, Aye ye Mutonyi. Lekai bakangite kimye kimo, kabiji popo mukamona kintu kimo kyaubiwa, mwamona, mulekaitu.

Pamo nobe demona, Amiwa kechi na kipangilepo demona ne. Aye wiyatú kwi amiwa kabiji ne kununusha. Nanchi ipo Lesa po aile nakwingila, monai, abyo ibyo, kabiji mwamwene byo kyaubiwe. Kijitu bulongo. Bino Amiwa ne kilekeletu kyapita. Kyalengejile kupwila kwakosa, mambo awa mupashi waendelenga mwi amiwa kimye kyonse, mwamona. Kabiji nanchi Amiwa natwajijiletu.

⁶⁰ Bino pano, abo bantu, kechi Nekikwatankenye ne. Kabiji kyajinga myaka ibiji palutwe, nangwa isatu, byo Najinga ku Green Mill, Indiana, kuno, pa nzubo ya bwenyi ya basikauti. Amiwa najinga mu lukelo lwakala mongya Nakulomba. Kabiji akwa kunyuma, Naambile mba, “Nkambo, Amiwa kechi nauvvine musango wa boba bantu ne. Bantu bawama bingi bo Nakumanyapo mu bumi bwami, kabiji Amiwa—Amiwa kechi nakonsha kukwatakanya byo akonsha kwikalá mupashi watama ne. Byo kya . . . inge pano . . . Anweba mwayuka bukishika bwa muchima wami byo buji. Anweba mwayuka Amiwa byo ne Mutemwa kabiji ne byo Nemwingijila Anweba. Kabiji yenka Mupashi umo uji muno, ne amiwa, ye wajinga pa baabo bantu. Kabiji pano byo Kyajinga pa yewa shetu, popa, musangotu umo.” Nanchi Amiwa kechi nakwatakenye ne.

⁶¹ Kabiji aye Nkambo waishile pansi monka mulusa Lwanji ne nkumwesha. Apo ipo pokyajinga. Kyafwainwa kwikalá ke Kyanembwa, patanshi. Aye waambile mba, “Tolai Baibolo wenu.” Kabiji Natolele Baibolo wami. Naketekela mba Nakwachile awa Baibolo mamineti teni kwakubuula nangwa

umo ne... Kyambo kiji kyonse kwiya ne. Napembejileko bimye bicheche. Namumvwine Aye kwamba jibiji, "Zhilukai mu Bahebelu 6 ne kutatula kutanga." Kabiji byo Naubile. Kabiji byo kyafikile popa, apo po Kyaamba mba, "Aye mvula unokela pa mushiji ne ku mutekesha kabiji ne kumunengezha, ne kumenesha biji mu... pakuuba miba ne bisonsonya, biji pepi nakulengululwa, mpelo yabyo ke kusokwa." Kabiji Nekimwene ponkapatu.

Nalangulukile mba, "Abyo byokiji. Lusachilo lwikale kwi Lesa! Abyo byokiji." Mwamona?

⁶² Pano, Yesu waambie mba, "Muntu waile na kukusa nkunwa yawama," Aye kechi waubile nenyi? Pano, anweba bonse muno mwi Benakilishitu. Muntu yense asutuleko maboko anji, nangwa byonkabyo, Pentekosito, basemwa-jibiji Benakilishitu. Kijitu bulongo. Abo... Kabiji Aye waambile mba, "Wa kubyala kunwa waile, na kubyala kunwa. Kabiji byo alajile..." Kukokoloka kwanji, lufu, pakachi. Mwamona? "Kabiji byo alajile, mulwanyi waishile wakusamo bincha mu bujimi." Bincha kyokika? Seku, bisonsonya ne bantu bikwabo. Pano, "Kabiji mwine mwinabujimi (musapwishi) byo amwene bibye bincha ke bikome, waambie mba, 'Lekai ne biyokolemo.' Aye waambile mba, 'Ine, ine. Anweba mwakonsha kuyokwela kumo wichi ne ayo. Bilekai binkomene pamo.'"

⁶³ Kuji bujimi bwa wichi kuno. Muji bitabataba, byasana, sokotela, ne byonse mobiji. Abyo ibyo nyi? Pano, bino, monkamwa muji ne wichi. Pano, mvula inokela pantanda, mu kwiitekesha. Pano, aya mvula ya byepi? Kechi ya kutekezha byasana ne. Pano talai ne kuteshako muchima. Kechi mu kutekezha bitabataba ne. Mvula ishila mambo a wichi, pakuuba byasana ne sekü byonse biji na kilaka kyonka kijipo na wichi. Kabiji mvula umo yeka unokela pa wichi ye unokela ne pa sekü. Kabiji awa luseku mucheche wakala wimana waoloka byonkabya, kabiji kusekela ne kusangalala, nobe byonka wichi wa mucheche byo akonsha kwimana ne kwiyimika aye mwine.

⁶⁴ "Pakuuba konka ku bipangwa byabyo ko mukebyukila." Abyo byokiji. Mwamona? Pano, awa Mupashi Wazhiala yenka umo wakonsha kuperisha kafutufutu. Akyo kyafumyamo anweba bambo bena Armenia, bino akyo bo Bukine. Abo bo Bukine. Bafunjishiwa buzhile, ne amiwa Naketekela mu buzhile, ne abo. Pakuuba Mupashi umo, mvula unokela pa baoloka ne pa babula koloka, pakuuba ku bipangwa byabyo ko mukebayukila.

⁶⁵ Inge Nakeketa kabiji naya nakutola wichi, Natola wichi, pakuuba sekü yonse ikaswa mubikuta. Kabiji abo bekala na bumi ku mvula umo yenka wanokejile pa wichi. Bino mvula kechi watumijilwe sekü ne, watumijilwe mambo a Wichi. Pakuuba mvula byo anji mu bujimi, wichi byo aji... sekü byo iji mu bujimi bwa wichi, ya mwenejilemo buwame mu yoya

mvula byonka byokiji ku byashala. Kabiji mvula umo yeka walengele wichi kwikalala na bumi, ye walengejile seku nayo kwikalala na bumi.

⁶⁶ Bantu byonse byubiwa ku mubiji byapashang'ana na bya bumupashi, nobe byonka byo tubena kufunjisha. Abyo byokiji, lufunjisho lwa pa bademona, bademona kwipashang'anya na Bwinakilishitu, nangwa byonkabyo, na mapesho. Ao kechi mukaka ne, balongo, inge mwakonsha kwikitambula. Mwamona? Mwamona? Pano, ke—kyá Bukine.

⁶⁷ Nanchi, Amiwa kechi napuluka leelo mambo Nakonsha kubijika ne. Amiwa kechi napuluka mambo Mbena kumvwa nobe Napuluka ne. Amiwa napuluka mambo Nakumenye nkebelo ya yuwe Baibolo. Yesu waambile mba, "Aye umvwa Byambo Byami ne kumwitabila Aye watuma Ami, uji na Bumi bwa myaka, kabiji kechi ukeya mukinje ne, pakuuba kulufu wafumako ne kuya ku Bumi." Naketekela kyokyo. Abyo ibyo. Kabiji pa yonkaya nkebelo Amiwa napuluka, mambo Lesa ye wikyambile.

⁶⁸ Inge aye wambujile mba wapuluka mambo muntu umo waambile mba, "Mwela mukatampe wafinkijile mu kilungi," akyo kyawama, bino Nasaka kuyuka kwafuminenga yeo mwela mukatape kasa akyangye kufikila mu meso, mwamona. Pano, ng'anyi musango wa bumi boukekala panyuma ya kukufikila awa mwela mukatampe? Mwamona? Monai, konka ku bipangwa byobe kobakuyukila. Nanchi, bademona bakonsha kwingila monka mukachi ka Benakilishitu. Mwaketekela kyokyo nyi? Talai pe Paulo, Paulo waambile mba . . .

⁶⁹ Pano papo ba Juba-Jamvula Wakulutwe . . . Inge mujipo bambo muno, ndekelaiko mambo inge Mbena kwamba byatama kiji kyonse kwi anweba. Amiwa kechi nakonsha kwamba kyatama kwi anweba ne byonka byo Nakonsha kubula kwamba ku ba Assemblies, nangwa bakwabo, ba Baptist, nangwa mukwabo yense. Ke Bukine bo buji Bukine. Po mwafumijilemo, pajinga papo: anweba mubena kulenga ba ngauzhi kufuma mu bantu ne bintu byabula bangauzhi. Bangauzhi kechi "babikwapo maboko" bino batumwa ne. Bangauzhi basemwatu. Mwamona? Mu Baibolo, muji kya *bupe* kya kwaaula. Apo ipo kilubo kyenu po kyajinga, pakachi ka kya bupe kya kwaaula ne ngauzhi. Kya *bupe* . . .

⁷⁰ "Lesa, mu bimye byakala ne misango yapusanapusana waambile kubashakulu kupichila mu bangauzhi, mu ano mooba akupelo kupichila mu Mwaana Wanji, Kilishitu Yesu." Kabiji Mubiji wa Kilishitu uji na bya bupe naini bya bumupashi bingila mwi akyo. Kabiji kyafwainwa kwikalala pa *yuwe* mwanamukazhi bufuku buno, waaula, kape kechi kyakonsha kubwelapo mu bumi bwanji ne. Kyakonsha kwikalala pa *yuwe* mwanamukazhi bufuku bwalondelapo. Kapepo pa *yuwe* mwanamulume kimye

kyalondelapo. Kapepo, pa *yewa* uji kokwa kunyuma, kimye kyalondelapo. Akyo kechi kimulengela kwikala ngauzhi ne, kechi kilengela umo kwikala ngauzhi ne. Ke kya bupe kya kwaula mwi obewa.

⁷¹ Kabiji awa muntu kasa akyangye nangwa abwa bungauzhi kasa bukyangye kupewa ku kipwilo, bwafwainwa ksesekwa ku babiji nangwa basatu bamitonyi ba bumupashi. Abyo ibyo nyi? Monka mobyaila, pano, Paulo waambile mba, “Anweba bonse mwafwainwa kwaula, umo umo.” Inge kintu kimo kyasololwa ku *iwe* umo, lekai *yewa* mutanshi azhindame. Kyawama, akyo kyakonsha kulengela jibumba jonse kwikala bangauzhi, mwaila lufunjisho lwa leelo. Ine, kipwilo kya Pentekosito, tuji na bintu byonse byalubakana. Kabiji ao oene mambo Lesa kechi wakonsha kwiyamo ne, poso bintu byaololwa mwaila Baibolo. Abyo ibyo. Mwafwainwa kwenda mu jishinda ja itabilwa. Wakonsha kushimika byepi nzubo kwakubula kumona pa kyalengwa ne? Mwamona? Mwafwainwa kutatula bulongo.

⁷² Pano, monkamwa, ngauzhi, kechi mwamonapo muntu umo kwimana ku meso akwa Isaya, Mosesa. Umo waimene, Kola, juba jimo, kabiji waesekele kupachika nanji, kabiji Lesa waambile mba, “Ipatuleko obewa mwine, Mbena kushikula ntanda kabiji . . .” Ngauzhi usemwa. “Byabupe ne byalwito . . . -bula lulapilo.” Ako ko kutongwela jimo kwa Lesa, kufuma ku lukeke ne byo akoma. Bintu byonse byailengatu nakulumbuluka, kine monka moaambijile mo nwajinga bukine bwashinikishiwa kabiji ne kulupuka. Ke Kyambo kya Lesa, kiiya ku ngauzhi. Pakuuba kya bupe kya bungauzhi kitawanu mu kipwilo.

⁷³ Pano anweba mwaambile mba, “Kyawama, bangauzhi ke mu Lulayang’ano Lwakala.” Oo, ine! Nalo Lulayang’ano Lupya lwajinga na bangauzhi.

⁷⁴ Agambasa wajinga wa-wajinga ngauzhi wa mu Lulayang’ano Lupya. Talai pa Mupashi wa kwaula byo aponene kokwa ne kubuula Paulo pa kyokyo. Pano uno wiya Agambasa kufuma ku Yelusalema, kabiji wataine Paulo, ne kwikasa mukwandala, kabiji waalulukile ne kwaamba mba, “BYO BYAAMBA AYE NKAMBO, muntu wajikumvwala kikye ukakaswa mu fungwa byo akafika ku Yelusalema.” Agambasa, waimene ne kubuulang’ana, waambijile jimo bikamweka, aye wajinga ngauzhi, kechi muntu na kya bupe kya kwaula ne.

⁷⁵ Kabiji byabupe bya lubuko ne byonse bya byabupe, balunda nami ba Pentekosito, anweba mwibimvwanga. Bya bupe biji mu kipwilo, kya bantu baji mu kipwilo, muntu uji yense wabatizhiwa mu Mubiji. “Konka ku Mupashi umo atweba bonse kotwabatizhiwa.” Kabiji Baibolo waamba mba . . .

“Kyawama, Amiwa njina kya bupe kya lubuko.”

⁷⁶ Kyawama, Baibolo waamba, “Isolwelai mambo enu umo ne mukwabo, ne kwilombelela umo ne mukwabo.” Muntu yense

alombelele umo ne mukwabo. Atweba kechi twi jibumba ja abenamo ne; atweba tuji pamo, jibumba ja bungakana pamo. Mwamona?

Pano, kabiji momo imo bademona mo bengijila bimye bimo.

⁷⁷ Pano monai byaambile Paulo mba, “Inge umo waamba na jimi kabiji mukwabo alumbulule, kabiji byonse byo aambil, lekai byesekwe patanshi kipwilo kasa kikyangye kwibitambula.”

⁷⁸ Bino, kechi kikekala kwambulatu Kinembelo, nangwa kintu kikwabo kiji byobya ne. Lesa kechi wipitulukamo Aye mwine ne. Bino kikekala ke lujimuno ku kipwilo. Nanchi inge ba mitonyi bawama baamba mba, “Twayai tutambule kyokyo.” Kijitu bulongo, kyajinga kya aye Nkambo. Awa wabubiji waamba mba, “Twayai twikitambule.” “Mutunwa twa bakamonyi babiji nangwatu basatu, lekai kyambo kyonse kikajikwe.” Nanchi kipwilo bekitambulwila kabiji kinengezha ne kwinengezha ku kikye. Inge akyo kechi kyafikizhiwa ne, akya kyaambiwe, nishi muji na mupashi watama mukachi kenu. Abyo ibyo. Kabiji inge kyaiya kyafikizhiwa, nishi ke kusachila Lesa, aye Mupashi wakwa Lesa uji mukachi kenu. Mwamona? Pano, apo ipo po mwafwainwa kutajisha bulongo ne kwikala bajimuka. Nanchi, kechi mweseke kukajikizha ne. Amiwa kechi nakonsha kwilengela naikala na meso achiluluka kasa Njina akifufuya ne, mwamona, Nafwainwa kwikala waswa kwikala na meso akifufuya. Pano, amo imo bademona mo bengijila mu kibese kya bantu ba bumupashi.

⁷⁹ Pano tuji nakintu kimo kyazhika kibena kwiya papo, kabiji Naketekela mba kechi kyazhikishatu ne. Pano monka mu Mutanshi Samwela 28, Nasaka kutangapo Kinembelo kimo pakino kimye. Nasaka anweba kuteleka bulongo. Kabiji Nakeba kuleta “bademona,” kwimumwesha anweba byo bengila mu kipwilo, kabiji ne Satana byo apashang’anya kintu kyonse kitutulu kiji. Pano anweba mwakonsha kumona, mwaila Baibolo, amba bademona beya mukachi ka Benakilishitu kabiji ne byo bepashang’anya.

⁸⁰ Kabiji bimye byavula twambila bantu mba Benakilishitu umvwae baamba mba, “Amiwa naitabila mwi Yesu Kilishitu.” Kika, ba diabola baitabila kintutu kimo, kabiji bazakama. Akya kechi ke kiyukilo kya kwamba mba wapuluka ne. Bufuku bumo Nasaka kwamba pa kusalululwa, kabiji pano po mukamona lupulukilo byo bwalumbulula. Mwamona? Kafwako nangwa kimo kyo wafwainwa kuuba nakyo ne, kyakutatwilapotu, nangwa mu kupelako, mambo kafwako nangwa kimo kyo wakonsha kuuba pakyokyo ne. Lesa upulusha muntu, kwakubula kubikako mizhilo. Mulunda, akyo kitwele pazhika, kechi ibyo nyi? Pano, wafwainwa kufumya byobyo mungubilo yobe, potukiji na kyokyo. Kijitu bulongo.

⁸¹ Abulahama wajinga ntendekelo ya lwitabilo lwetu. Abyo ibyo nyi? Oo, Abulahama wajinga na mulaye. Kabiji Lesa wamwichile Abulahama mambo wajinga muntu mukatampe, Naketekela? Ine, mwane. Aye wafumine ku Babilona, mu-mu ntanda ya bena Kalondeya, mu muzhi wa Ula, kabiji Lesa wamwichile ne kulenga lulayang'ano Lwanji ne aye, pabula mikambizho. "Amiwa kakupulusha obewa. Kabiji kechi obewa yenkatu ne, Abulahama, ne Lunkunwa obe," pabula mikambizho.

⁸² Lesa walengele lulayang'ano na muntu, kabiji muntu uzhilulula lulayang'ano lwanji kimye kyonse; muntu kechi walamine lulayang'ano lwanji na Lesa (Mizhilo kechi yalaminwe ne; abo kechi balamine mizhilo ne; Kilishitu waishile na nkonauna mizhilo, Ayemwine.) mambo lusa lwanengezhezhe kala mupulushi, Mosesa, wanengezhezhe jishinda ja kupulukilamo, kabiji pano, nangwa jakupulukilamo, kabiji pano bantu, panyuma ya kyokyo, abo bakebelenga kintu kimo kyakuuba. Muntu kimye kyonse usaka kuubapo kintu kimo kyakwipulusha aye mwine, bino kasa bakonsha kubula kwikyuba ne. Kyo kisemwa kyanji. Kimye kyo ataine kuuba mba uji mulekese, mu bujimi bwa Edena, aye walengele empulo wa mabula. Abyo ibyo nyi? Bino wataine mba kechi byakonsha kwingila ne. Kafwako muntu kyo akonsha kuuba kya kwipulusha aye mwine ne. Lesa ukupulushatu, pabula mikambizho, monse mu mankulo. Kabiji umvwe wapuluka, nishi wapuluka.

⁸³ Monai pe Abulahama. Awa mulongo wajinga, waile kokwa, kabiji Lesa wamupele ntanda ya Palasitani ne kumubuula amba kechi akafumeko kokwa ne. Yense mu Yudeya ufuma mu Palasitani nishi wabwela panyuma. Lesa wamubujile kwikala konkakwa. Inge Lesa wakubuula mba ubepo kintu kikwabo, kabiji wabula kwikyuba ne, nanchi wabwela panyuma. Abyo ibyo nyi? Kijitu bulongo, kwaishile kyashi, mu kweseka lwitabilo lwa kwa Abulahama. Kabiji mukifulo kyakuuba mba Abulahama ekale konka, ine, aye kechi waikeleko kokwa ne, aye wanyemene, kabiji wasenda ne Sala kabiji waile pepi nobe fili aduleendi mailoshi (nanchi inge Najinga na kimye kyakufika mukyokyo) kuya muntanda ikwabo.

⁸⁴ Kabiji byo akafikile kokwa, kabiji pano wakatana yuwe mfumu mukatampe kokwa, Abimeleki. Aye wajinga mulongo mwanyike kabiji wakebelenga mutemwe wanji, nanchi wataine mukazhanji Abulahama, Sala, kabiji waikele nanji na butemwe. Kabiji Abulahama waambile mba, "Pano, umubuule mba obewa wi nyenga yami kabiji amba Amiwa ne mulongo obe."

⁸⁵ Nanchi akya kyamutokeshe pa muchima Abimeleki, nanchi waambile mba, "Kijitu bulongo, tusakumutwala kokwa ku kipango." Kabiji Amiwa nalanguluka mba mwanamukazhi

winengezhezhe, kabiji aye wasakile ku musongola juba jalondejilepo.

⁸⁶ Kabiji Abimeleki wajinga muntu wawama, muntu waoloka. Kabiji abwa bufuku, kimye kyo alajile, aye Nkambo wamwekele kwii aye ne kumwambila mba, “Obewa ujitu pamo nobe muntu wafwa.” Aye waambile mba, “Awa wanamulume... Ao mwanamukazhi ye uji nanji amba umusongole, ke mukazhi wa muntu mukwabo.” Pano monai. “Mukazhi wa muntu mukwabo.”

⁸⁷ Kika, aye waambile mba, “Nkambo, Anweba mwayuka nkebelo ya muchima wami,” ke muntu waoloka, muntu wazhila. “Anweba mwayuka bukishika bwa muchima wami. Awa mwanamulume wambujile mba nyenga ‘yanji.’ Bushe aye mwine kechi wambujile ne, mwine mwanamukazhi, amba awa ‘mulongo wami’?”

⁸⁸ Aye waambile mba, Lesa wamwambijile mba, “Nayuka bukishika bwa muchima obe, kabiji oene mambo o Nakukainya kulenga mambo ne Amiwa. Bino awa ye ngauzhi Wami!” Aleluya!

⁸⁹ Aye wajinga ng’anyi? Wabwela panyuma, kabiji pacheche, wabuvu uji na bubela. Abyo ibyo nyi? Oo, ine, kechi kujipo ne bubela bucheche butoka ne. Buji nangwa bubela bufita nangwa kechi bubela ne. Awa mwanamulume waikala popa ke ambe bubela-bufita, kwamba mba “nyenga” yanji kasa aji mukazhanji, wapichilenga mumbaji, ne kubwela wabwela panyuma.

⁹⁰ Kabiji apo pajinga muntu waoloka waimene ku meso a Lesa, ne kwaamba mba, “Nkambo, Mwayuka muchima wami.”

⁹¹ “Bino Amiwa kechi nakonsha kumvwa milombelo yobe ne, Abimeleki, pakuuba musende...mubwezhe kabiji aye akulombelele ne ku kulombelela. Aye ye ngauzhi Wami; Amiwa nsakumumvwa.” Ee, wajinga wabwela panyuma, wa bubela, bino, “Ye ngauzhi Wami.” Akyo Bukine? Ao ye Baibolo.

⁹² Pano, kechi mwakonsha kuisha palepa mulubaji lwa kwa Keovini, “Inge uji mu bupe, ukekalandatu mu bupe,” mambo obewa ukatwela mu kyabuvu. Mwamona? Pano, kakimye kachechetu, tukekala na kimye uno mulungu kyakuleta kyokyo kabiji ne kumwesha byo kyaesakana pamo. Bino kechi mulanguluke mba mambo wauba kintu kimo kyatama pano obewa wayijijila kikupu ne. Obewa wimwana kwa Lesa, obewa wasemwa ku Mupashi wakwa Lesa, anweba miwi baana babalume ne babakazhi bakwa Lesa, kabiji bipangwa bikeshimuna abyo bine. Abyo byokiji.

⁹³ Bino, papo tuji, twaikala mu ntanda. Pano, Nasaka kutanga papo, veeleshi wabu 6.

Kabiji Saulo byo aipwizhe kwi YEHOBA, aye YEHOBA kechi wamukumbwile ne, nangwa mu kiloto, nangwa na Yulimu, nangwa na ngauzhi ne.

Kepo Saulo ebambijile bakalume banji amba, Nkebelaitpo mwanamukazhi wisamba na bapashi, Amiwa ngyeko, Nkamwipuzhe.

Nakonsha kubikapo kintu kimo pa kamama ponkapo, pa mambo . . . “Nkebelaitpo mwanamukazhi wisamba na bapashi.”

. . . *Kabiji bakalume banji bamubujile aye mba, Talai, kuji mwanamukazhi wisamba na bapashi ku Ene-dola.*

Ponkapo Saulo wialwile aye mwine, ne kumvwala bivwalo, bingi bivwalo, ne kuya kaye, babiji . . . na bantu banji babiji, ne kufika bafikile ku yewa mwanamukazhi bufuku: kabiji abo bamwambijile mba, Nakupopwela, . . . -keko na mupashi ye wisamba nanji, kabiji unsolweleko . . . awa, ye Nsakutela pa jizhina.

Kabiji mwanamukazhi wamukumbwile mba, Talai, anweba mwayuka aby Saulo byo auba, mwayuka, byo ebepayamo bonse besamba na bapashi, kabiji . . . ne beyuka na bapashi, byo ebepayamo mu kyaalo: mambo ka . . . obewa ubenakuntela kakose amba mfwemo, ne nkundengela amiwa mfwe?

Kabiji Saulo wakumbwile mba, nachipa kwi aye mwi YEHOBA, amba, Monka mwaikajila YEHOBA na bumi, kechi kujipo kumanyikwa kwi anweba ne . . .

Kepo mwanamukazhi a mwambijile mba, Nanchi ng'anyi Ye nsakukusolwela . . . obewa? Kumvwa aye wamukumbwile mba, Nsolweleko Samwela.

Kabiji mwanamukazhi byo amwene Samwela, wabijikile na jiwi jikatampe: kabiji mwanamukazhi wamwambijile Saulo, kwamba mba, Kika kyo wajimbaikila amiwa? mambo anweba mwi ba Saulo.

Kabiji mfumu wamwambijile mwanamukazhi mba, Kuuba moyo ne: i kika kyo wamona? Kabiji mwanamukazhi waambile mba Na . . . kwi Saulo, Namona ba lesa babena kufuma pansi.

Kabiji aye amba, Nanchi wamweka byepi pa kumutala? Kabiji mwanamukazhi wamukumbwile mba, Mwanamulume mukote ubena kulupuka; wavwala kimvwalo kyalepa. Kabiji Sam- . . . (Awa ke mukukumba wa ngauzhi. Mwamona?) . . . wayukile mba iye Samwela, kepo aimene na . . . kasa anyengeka mutwe wanji pansi, ne kumulambila.

Kabiji Samwela waambijile Saulo mba, Nanchi kika kyo mwankatezha anweba, na kungita amiwa? Kabiji Saulo wakumbwile, ne kwamba mba, Amiwa

namanama bingi; mambo bena Filisitiya babena kundwisha amiwa, kabiji ne Lesa naye wafumako kwi amiwa, kabiji kechi ukinkumbulapo amiwa ne, nangwa na ngauzhi ne, nangwa mu biloto ne: onka mambo Amiwa... nemwichila anweba namba, mwakonsha Nkumbulako kyo nafwainwa kuuba.

Kepo Samwela amwambijile mba, *Nanchi mambo ka...kyo mwangipwizha...ami, byo mwayuka mba aye YEHOBa wafumako kala kwi anweba, ne—ne kwikala kaji mulwanyi wenu?*

Kabiji YEHOBa aye wauba kwi anweba, monka mo aambijile mwi amiwa: mambo aye YEHOBa wa angata kala bufumu mu kuboko kwenu, kabiji ne kwibupana ku mukwenu... Davida:

⁹⁴ Pano, anweba bavula, abyé byayukanyikwa. Pano twakeba mu kikye, kabiji Lesa etukwashe, pa bimye bicheche, tuye mukikye. Pano monai. Kwajinga muntu, Saulo, ao kimye kimo wamwekele nobe ngauzhi, mambo aye wa awilenga pamo na bangauzhi. Abyo ibyo nyi, bafunjishi? Bino, papo awe muntu wajinga wabwela panyuma. Abyo ibyo nyi? Bino vulukai Samwela waambile ko akekala, nanji, pa juba jikalondelapo. Kuya kwakubula kufikilamo ne, mwamona. Kijitu bulongo, inge wabula kutako muchima kwi Lesa, Lesa ukakufumyapo pantanda.

⁹⁵ Talai mu kalata yabena Kolinda papo, Paulo byo ebabikile aba bantu mu ndonda. Aye waambile mba, “Patanshi, Namusachila Lesa namambo a anweba, amba mukachi kenu kechi muji bibye bintu ne, ne bikwabotu, kabiji byo—byo mwabula kushalamo mu bya bupe bya bumupashi ne.” Kwibabula byo bajinga, kifulo kyabo, mwi Kilishitu. Pano aye po atatwile kwimba nsando pe abo, ne kwibabula pa banabakazhi baabo basapwishi, kabiji ne byo baubilenga bintu, ne byo bajilenga ku tebulu wa Nkambo.

Kabiji muntu umo wenda na muka shanji, kabiji waambile ku yuwe mwanamulume mwi Kilishitu, “Mupanai kwi diabola, mubiji wanji onaika, amba mweo wanji akapuluke.” Mwamona, byokiji, mupanai. Aye Baibolo waamba mba, “Mambo na onka ano mambo bavula ba mwi anweba banekena ne kukolwa, kabiji bavula baponena kala mutulo,” bayá kala kimye kasa kikyangye kufikila ne na mambo abubi. Lesa wakufumyamo mu jishinda; kiyukilo kyawama amba wajinga Mwinakilishitu, inge wafumishiwapo.

⁹⁶ Nanchi, pano monai papo, Saulo watelelwé kwikala umo wa bangauzhi, nangwa umo wa mu bangauzhi, mambo aye waawile. Pakuuba papo wajinga wabwela panyuma, mambo kechi wakojejile Lesa ne, kabiji bufumu bwanjí bwaangachilwe

mu maboko anji ne kwibubika mu kuboko kwa Davida, ao Lesa ye ashingile manyi kwi Samwela, na mutumwa wa manyi.

⁹⁷ Monai, pano, baginga na mashinda asatu o baginga nao akutainamo bintu kufuma kwi Lesa; kitanshi kyajinga—kyajinga ngauzhi, kya bubiji kyajinga kiloto, kabiji kya busatu kyajinga Yulimu ne Tumimu. Kabiji byonse kechi bya kumbwilenga ne. Bino, mwayuka ngauzhi ye muka, mwayuka kiloto kya bumupashi kyo kika, kabiji mwayuka Yulimu ne Tumimu byo ajinga. Anweba mwayuka, juba jikwabo Naipwizhe—mwanamulume na mambo a Yulimu, kabiji awa muntu kechi wakonsheshe kumbula byokiji ne, Yulimu ne Tumimu. Mambo, kyajinga Lesa wakumbwilenga na bibye. Mwamona?

⁹⁸ Kabiji diabola usombolola byonse bye; mulozhi, ngauzhi wabubela, kabiji ne yewa umona na kilola. Mwamona?

Pano, Yulimu ne Tumimu wakobaminenga pa kyaji kya kwa Alona, *papo*, kabiji awa Yulimu ne Tumimu wamvwetanga pa mabwe. Kabiji ba mukobekelenga mu topo. Kabiji umvwe kechi baji na luketekelo lwa kintu ne, bayanga ku meso akwa Lesa, amba akumbule, kabiji kyeya kya bekulanga pa yewa Yulimu ne Tumimu, akyo, kyajinga kana kyo kyaswa muchima wa Lesa nyi, nangwa ine. Pano, inge Yulimu ne Tumimu wabula kupana mukumbu... Bino, awa wajinga mukumbu wafuma kwi Lesa.

Pano, Yulimu ne Tumimu wa buleelo; ubulang'ana lutwe lwa muntu watolele kilola, mu kufwanyikizha Kyokya; kintu kyabubela. Lesa utanwa mu bibese bisatu; bulume bwa Lesa buji mu bibese bisatu. Kabiji diabola uji mu bibese bisatu, kabiji ne bulume bwanji buji mu bibese bisatu. Kabiji Amiwa nakonsha kwikishinikisha na Baibolo. Kabiji awa Yulimu ne Tumimu, kyo... kyonka kilola diabola kyo engijisha leelo. Kabiji ngauzhi wabubela kuno leelo, awa yetuji nanji leelo, wajinga, nangwa, mulozhi, nangwa yewa ubulang'ana lutwe lwa bintu, watolele kifulo kya ngauzhi, ku lubaji lwa diabola. Mwamona mo Nekitazha?

⁹⁹ Pano, nachi, Yulimu ne Tumimu wa leelo ke Baibolo. Inge muntu wapana bungauzhi nangwa kiloto, kabiji kyabula kwesakena pamo nangwa kwitabazhanya na Baibolo wa Lesa ne, ke kyabubela. Kechi mwikitabe ne.

¹⁰⁰ Mwamamulume umo wayishile kwi amiwa kechi papita bimye byabaya ne, kufuma ku India, ako ko Mbena kukeba kuya, musapwishi wawama mucheche mubiji. Aye waambile mba, "Mulongo Branham, Naiya kuno." Waambile mba, "Mwanamukazhi umo wajinga na Mupashi Wazhila, ne," kwamba mba, "wajinga mwanamukazhi wawaina bingi, mwanamukazhi wakila mu kuwama." Aye waambile mba, "Kabiji wasongolwa bimye foolo, ne ye aji nanji ke mulume wabu foolo. Kabiji Naambile mba, 'Kyawama, akyo kyakonsha

kwikala byepi, Nkambo?”” Kabiji waambile mba, “Naile kwi Aye ne kwamba mba, ‘Oo, lukumo lwikale kwi Lesa!’ Waambile mba, ‘Aleluya! Jitotwe ja Nkambo!”” Ke umo wayewa musango, mwayukatu. “Waambile mba, ‘Aleluya! Jitotwe ja Nkambo!”” Waambile mba, “Aye Nkambo wambujile mba, ‘Apo, Amiwa nsakukupa kiloto.”” Kabiji waambile mba, “Amiwa nalotele mukazhami, Namumwene ubena kwikala mu bukende. Kabiji mwanamukazhi wabwelele kwi amiwa ne kwamba mba, ‘Oo, anweba musakundekelako mambo, Victor? Mwakonsha kundekelako mambo nyi? Amiwa kechi naubile ne...’ ‘Kika,’ Naambile mba, ‘kine, Amiwa sakukulekela kabiji kubwezhe.’” Aye waambile mba, “Pano, abyō byo Naubile.” Waambile mba, “Mwamona, Nakulekela.”

¹⁰¹ Naambile mba, “Victor, kiloto kyobe kyajinga kyawaina bingi, bino mwalwanyi ye wakupeleyko.”

Aye waambile mba, “Kika?”

¹⁰² Naambile mba, “Kechi kyaesakana pamo na Kyambo kya Lesa ne. Mwanamukazhi ubena kwikala mu bukende. Kyakine. Aye kuuba waikala na banabalume foolo ne. Ibyo. Aleke byobyo abwela ku mutanshi, watamishatu kukila byo ajinga pantendekelo. Aye wafwainwa kwikala bunke, bumi bwanzi bonse.” Naambile mba, “Anweba mwayuka mba akye kechi kyaesakana pamo na Kyambo kya Lesa ne. Nanchi aye... Kiloto kyobe kyajinga kyabubela.” Naambile mba, “Kechi kyakonsheka kwesakena pamo na Kikye ne.”

¹⁰³ Kabiji umvwe ngauzhi wapana bungauzhi, kabiji waamba, kabiji bakeba kumona kana abwa bungauzhi bwajinga bwakine, be bubika ku Yulimu Tumimu. Kabiji inge Jiwi ja Lesa ja bikapo kyeya pa Yulimu Tumimu, nishi kyajinga kya kine, Bukine. Kabiji umvwee muntu wapana kulumbulula, wapana kiloto, wapana kintu kiji Baibolo, kabiji, nangwa kintutu kikwabo, kabiji kyabula kwesakana pamo na Baibolo wa kwa Lesa ne, ke kyabubela. Ao ye Yulimu ne Tumimu wa leelo. Kyambo kya Lesa kyamba, ajo ke Jiwi jifuma kwi Lesa, nobe Yulimu Tumimu wajingako Baibolo kasa akyangye kunembwa. Amena! Aleluya! Amiwa naumvwa musango wa bupopweshi. Kechi mu moone nobe wabisela ne, inge mwakonsha kuuuba. Amiwa nayuka, Amiwa nayuka Mponji. Amiwa kechi nasangalala ne. Abyo ibyo.

¹⁰⁴ Buno bo Bukine, Kyambo kya Lesa! Amiwa kechi natako muchima musango wa kiloto kyo wajinga nakyo ne, nangwa ng’anyi musango wa bungauzhi bo wapana ne, inge kechi Kyambo kya Lesa ne, ke kintu kyatama, inge kyabula kwesakena pamo na Kyambo. Alo lo lukatazho leelo. Umo uji na kiloto, umo uji na kimwesho, umo uji na lujimi, umo uji na lumwekesho; bintu byonse byayatu mungi ne bikwabotu, muji na madinominesheni ne konauna bintu byonse. Mwafwainwa

kwikibwezha ku kintendekesho kyapelako, kabiji akyo kyo Kyambo kya Lesa. Akyo kine.

¹⁰⁵ Bipwilo byanshimikwa pa kimo, waambile mba, “Oo, Yesu ubena kwiya pa mbili utoka. Nayuka. Namumwene Aye mu kimwesho.” Balenga kipwilo kya yewa musango. “Oo, aleluya! Aye ukeya pa jikumbi.” Abo bekilenga tuyewa musango. Kibapalang’anya, ne kwibabanya, kabiji ne kwiyita abo bene mba “kabemba wikalatu ku kichi,” kabiji “lukuso ukakachila,” kabiji ne byonse bya musango yewo. Kika, mulongo, kimweshatu mba, patanshitu, muchima obe kechi uji bulongo na Lesa ne umvwe wauba kyokyo. Abyo ibyo. Atweba twi balongo. Twafwainwa ku kwatankana umo na mukwabo. Tubena kwikeba umo ne mukwabo.

¹⁰⁶ Pano talai. Saulo wajinga wabwela panyuma, kabiji waya kulutwe. Aye, Lesa, wafumisheko kilungi Kyanji kwi aye. Kabiji aye waile kokwa na kwipuzha ku bangauzhi. Bangauzhi baile na kweseka kwaaula, kabiji Lesa wibachibileko, kechi wapaine kimwesho ne. Ngauzhi waishile, ne kwaamba mba, “Amiwa kuuba nauba ne. Ine. Aye kechi wambulapo kintu kimo pe obewa ne.”

¹⁰⁷ Kyawama, nanchi aye waambile mba, “Yehoba, mpai kiloto.” Bufuku pa bufuku, kechi kwaishilepo kiloto ne.

¹⁰⁸ Pano aye waya mu Yulimu ne Tumimu, kabiji waambile mba, “Anweba Lesa! Naeseka bangauzhi, Amiwa naeseka biloto, pano Anweba nkwashai ami. Mwakonsha kwi kyuba Anweba?” Wachibiwako, kafwako Kyeya kyasamine nangwa pachechetu ne.

¹⁰⁹ Nanchi aye waalulukijiletu ku mulozhi, pansi, wibwezha pansi. Kabiji aye waile ku mwanamukazhi, wakalabile kuyako kabiji wifiile aye mwine. Kabiji awe mulozhi waya na kwita mupashi wakwa Samwela.

¹¹⁰ Bino, Nayuka kyo ubena kulanguluka. Bavula baamba mba, “Awa kechi wajinga Samwela ne.” Pakuuba Baibolo waamba mba wajinga Samwela, kabiji wajinga Samwela. Ke kyenyi byo mwikikwata byobyo, kechi ibyo nenyi? Bino awa wajinga Samwela. Aye Baibolo waamba mba byo kyajinga.

¹¹¹ Kabiji awa mulozhi wamwichile, wamwichile Samwela. Kabiji Samwela wajinga kuntu kungi, bino wajinga na buyuke bwa bintu byaubiwenga, kabiji wakimene na mukukumba wanji wa bungauzhi. Nanchi, mulongo, inge wafwa, obewa kechi wafwa ne, uji kutu kumo, kuntu kukwabo.

¹¹² Lekai kimane pa kamineti kamo, pa kumvwisha lufunjisho lwa pa bademona kuyakotu palutwe pacheche. Aye wajinga na demona, bino mwanamukazhi wajingatu na lumvwang’ano lwa ntanda ya mupashi. Pano, leelo, kuji bavula bingi besamba na bapashi abo bayuka bingi mipashi pantanda

kukila bantu betongola abo bene kwikala Benakilishitu, nangwa byonkabyo aye demona. Mu bimye bya mu Baibolo kyajingatu musango umo.

¹¹³ Kimye Yesu kyo ajinga pano pantanda, pajinga mapolofensa ne bafunda ne bafunjishi, bamo bajinga ba muboba bawamisha, monka mu masukuulu a mambo awama kukila byo twakonsha kuleta leelo. Kabiji bazhila, buntu bayukanyikwa, byo bajinga. Inge mwina Levi watainwe, wajinga wabula kaneeneno, waoloka mu misango yonse. Kabiji nangwa byonkabyo awa muntu kechi wayukilepo nangwa kimo pe Lesa ne kukila kalulu byoakonsha kuyuka masapato a musino. Kimye Yesu kyo aishile, wakakelwe kumuyuka Aye, kabiji wamutelele Yesu mba “diabola.” Aye waambile mba, “Ye Belezebabuba, ye mfumu wa diabola.” Abyo ibyo nyi?

¹¹⁴ Kabiji kwaishile musango wa demona mwine wapeleshakotu, wakanshile muntu kokwa ku bilende, kabiji ne bintu byonse, kabiji baichile. Aye diabola mwine waambile mba, “Twayuka Obewa Yobe ng’anyi. Anweba mwi Mwaana wakwa Lesa, Yenka Wazhila.” Abyo ibyo nyi? Balozhi ne bambazhi, badiabola, bamuyukile Aye mba Mwaana wakwa Lesa; bino bafunda, basapwishi ba kumasukuulu a mamboawama ba muyukile Aye mba Belezebuba. Wajinga bulongo ng’anyi, diabola nangwa musapwishi? Aye diabola wajinga bulongo. Kabiji, mulongo, kechi kyapipulwa pabaya leelo ne. Abo kechi bayuka bulume bwa Lesa ne.

¹¹⁵ Nangwatu wafunjishiwa byepi, wakonsha kubijika kyokyo mwi obewa. Lesa kechi uji mu byambo bikatampe ne. Lesa uji mu muchima wabukishika. Obewa wakonsha kwimana kuno, ne kwamba byambo byabaya, nobe kechi Nayuka ne, akyo kechi kyakonsha kukuleta kwipi ne Lesa ne. Obewa wakonsha kwimana ne kupitulukamo kufunda mbila yobe ne kwamba bibye bintu, akyo kechi kikubwezha kwipi ne Lesa ne. Obewa wakonsha kufunda buuku ulondolola byambo poso walala na kimo, kabiji nangwa byonkabyo kechi kyakonsha kukubwezha kwipi ne Lesa ne. Wikepesha, muchima wipana, mu kwipezha, kyo kikuleta kwi Lesa. Kabiji akyo kya kine. Amena! Muchima wikepesha, Lesa umutemwa. Pano, nangwatu inge kechi wayuka ABC’s obe ne, akyo kechi kijipo na lupusano ne. Ke muchima wikepesha! Lesa wikala mu muchima wikepesha; kechi mukufunda ne, kechi mu sukuulu ne, kechi mu sukuulu wa mamboawama ne, masukuulu kufunjishiwa mamboawama, kechi mu byonse bye bifulo byapusapanusana ne; kechi mu byambo bikatampe ne, nangwa mu mampuzha awamisha ne. Lesa wikala mu muchima wa muntu. Kabiji kyonka kipimo kyobe kyakwibwezha pansi, kwikalatu wikepsa bingi, obewa wakonsha kwikala mukatampe ku meso akwa Lesa.

¹¹⁶ Lekai ne mupepo kintu kimo. Namona majimi enu mwayula wichi. Mutwe wapela wa wichi ukunama pansi kimye kyonse.

Awa mucheche wa kimye kya kisalo wimanatu, na kuzhokoloka nobe wayuka bintu byonse, kafwako nangwa kimo kijimo muyewa mutwe ne. Abyo byokiji na baabo banabalume bavula abo balanguluka mba baji na byavula mu mutwe wabo, bino kafwamo nangwa kimo kijimo mu muchima wabo ne, byonkabyo. Mutwe wazhila ukunama ku Bulume, umuyuka Yesu Kilishitu nobe Mwaana wakwa Lesa, kabiji ne kuketekela mingilo Yanji.

¹¹⁷ “Kabiji Aye ujitu pamo, ne keesha.” Oo, abo bamuyuka Aye, kine, mu musango wabujishimikila. Bino kechi kintu kya jishimikila ne. Bantu bemana ne kwamba mba, “Oo, Naketekela Pentekositi, kimye kyo bajinga na kwitulwilwa kukatampe ne bintu byavula bya yewa musango,” kabiji ne mujilo wa kupeta. Muntu ubena kufwa na mashika kechi wakonsha kumvwa kyuya na mujilo wa kupeta ne. Mujilo wa kupeta kechi upana kyuya ne. Abya byobyo bajinga. Kyokika leelo, inge Aye ujitu pamo keesha, leelo ne myaka yonse? Awa ke mujilo wa kupeta. Mulunda umo ubena kufwa na mashika, ne kwamba mba, “Tala pa yewa mujilo mukatampe ye bajinga naji.” Kika, akya kechi kyakonsha kukulengela kumvwa kyuya ne.

¹¹⁸ Byo baubile pa Pentekositi, byo bajinga nabyo mutatwilo ya Lulayang’ano, tuji nabyo leelo! Kabiji kimietyu Lesa kyo akolola bintu bulongo, kabiji ne Kipwilo kyaikala pamo, Kushikulwa nishi kwafika. Bino kechi twakonsha kwikala na lwitabilo lwa lubuko lwa Bulesa ne, pano byepi Kushikulwa, mambo atweba bonse twazhobakana, umo *mujije* jishinda kabiji mukwabo *mujaja* jishinda. “Dokotala *Kananga-ne-kananga* waambile mba Kyajinga *kikye*. Kyawama, musapwishi wami waambile mba Aye wajinga *Bibye*.”

¹¹⁹ Panyuma pacheche, mwanamukazhi umo waambile mba, “Awa muyaji kamulanda.” Waambile mba, “Pulisiti wami byo ambujile.” Amiwa nkeba mba awa pulisiti wanji kimye kimo akeyepo kuno, twakonsha kumona muyaji kamulanda ng’anyi. Ee. Kyawama tukamona muyaji kamulanda. Ukeye na kwikyeseke.

¹²⁰ Kuno kechi papita kimye kyabaya ne, mu Harlingen, Texas, twajinga na mpwijilo kokwa. Bajinga na biyukilo bikatampe, pa myotoka yonse abwa bufuku byo Naile kokwa, baambile mba ba FBI baji konka na kukeba kundengesha buvu mba muyaji kamulanda. Nanchi nsongwakazhi mucheche watambwile lubuko kuntu kumo akwa ku Texas. Aye wajinga kokwa, kabiji, Na—Naketekela, paji pepi nobe sauzande umo wa mama iloshi, akwa ku Panhandle. Kabiji kukwe kwajinga kwalepa ku Harlingen, konka ku mupaka. Mulongo Baxter waishile, ne kwamba mba, “Mulongo Branham,” waambile mba, “obewa kechi wakimonapo byabuvu biji koka ne, pepi nobe foolo nangwa faivi sauzande bantu.” Kabiji waambile mba, “Kabiji

pano, bazhokoloka konse, ba FBI basa ku kukwata kasa uji pa pulatifomu bufuku buno, bakulengeshe buvu.”

Naambile mba, “Kyawama, Amiwa njibingi na lusekelo pa kyoko.”

¹²¹ Waambile mba, “Mwayuka awa nsongwakazhi wamucheché ao wa bukilwe bufuku bukwabo?”

¹²² Amiwa nafuminenga ku nzubo...na twelelenga mu kibamba kyami. Naumvwine kintu kimo kyajijilenga, kabiji natajilenga konse konse. Nalangulukile mba kape muntu umo watulwa bulemo. Wajinga nsongwakazhi. Kabiji Natajile kunyuma. Naambile mba...Kabiji Nabwelele kunyuma, Naambile mba, “Lukatazho lwepi, Maama?” Kabiji bajinga bansongwakazhi babiji baimene byobya, pepi nobe sebetiini, eitiini myaka, bajinga pamo, bepakachilamo, kasa babena kujila.

¹²³ Waambile mba, “Mulongo Branham!” Nayukile mba abo bangyuka. Waambile mba, “Atweba, Namuletele aye kuno.” Waambile mba, “Aye wafwainwa kuya ku kipamo kilama bakonya.” Kabiji awa nsongwakazhi mucheché wajinga mu kupwila kwami kwajinga ku Lubbock, Texas. Kabiji waambile mba, “Nayukile mba inge Nakonsha kumuleta kuno ne obewa wa mulombelela, Naketekela Lesa wakonsha ku mubuka.”

¹²⁴ Kyawama, Nalangulukile mba, “Lwitabilo lwamusango ka!” Kabiji Naambile mba, “Kyawama, pano, nyenga, wakonsha ku muleta...” Kabiji ponkapotu Naambile mba, “Obewa wajikwiya mu motoka wa kibobo, kechi ibyo nyi?”

Waambile mba, “Ee!”

Kabiji Naambile mba, “Bainobe bakilema.”

Waambile mba, “Abyo ibyo.”

Naambile mba, “Obewa wi wa ku kipwilo kya Methodist.”

Aye waambile mba, “Akyo kine kya bukine.”

¹²⁵ Kabiji Naambile mba, “Pakwiya mu mukwakwa, mwashimwikale na mapuso. Obewa ne yuwe nsongwakazhi mwakusekanga byo mwakufika pajinga lubaji lumo lwa nshamende ne manenekela, kabiji mwakuzhokolokanga nkona.”

Waambile mba, “Mulongo Branham, akyo bo bukine!”

Naambile mba, “Kabiji, ABYO BYOBYAAMBA AYE NKAMBO, nsongwakazhi wabukwa.”

¹²⁶ Juba jalondejilepo awa mwanamukazhi wabazhile mujilo, na kubuula bantu bonse, nakupita kose konse mambo akyokyo. Mambo, abo kechi bamuyukile kokwa ne, kana wajinga mu yewa musango nangwa ine. Kabiji nanchi aja juba Na...Mulongo Baxter waambile mba, “Mulongo Branham,” waambile mba, “aba banabakazhi baji kokakwa basenda sutukesi wabo.” Kabiji akye kyajinga kintu kimo kyo abujile

kuyuka amba Amiwa ne kiyuka. Mali etuachepele bingi. Amiwa kechi na muleka mba ambepo pa kyokyo ne. Pakuuba umo nsongwakazhi wabikilemo madolla naini aduleendi mu—mu kilambwilo bufuku bwajingako, kabiji wabikile mali etu peulu. Pano, aye kechi wayukile ne, kechi wikiyukile ne kufikatu ne buji leelo, bino Amiwa nekiyukile. Mwamona? Amba Na . . . Lesa wambujile mba kikekalatu bulongo.

¹²⁷ Kabiji Mulongo Baxter waambile mba, “Mulongo Branham,” waambile mba, “undeke amiwa ngubepo kikoka kicheche.” Waambile mba, “Bekala na bamo baji na lubuko lwa Bulesa kuno bankoka bingi baabo bantu.”

¹²⁸ Naambile mba, “Kafwako. Ine, mwane. Anweba kuuba mwikyuba ne. Mulongo Baxter, kimye kyonse kyo ukoka bantu na mali tuyewa musango, akyo kyo kimye obewa ne Amiwa po tukeimuna maboko nobe balongo, Amiwa nkaya bunke.” Mwamona? Naambile mba, “Obewa kechi wakonsha kuuba kyokyo ne.” Naambile mba, “Lesa uji na bang’ombe bavula pa biumbi bya tu tumbatumba, kabiji bintu byonse byo Byanji. Amiwa nalamatia kwi Aye. Aye ukandamawizha.”

Aye waambile mba, “Kijitu bulongo.”

¹²⁹ Kabiji abwa bufuku bonka aye waambile mba, “Mulongo Branham, tala kuno. Muntu umo . . . Talai kuno! Awe avelopu uji mumwe, kechi pajipo jizhina ne, uji na naini aduleendi mali amadolla mukachi. Monka mwaila kukajilwa kwetu pakuuba mba tukumanishe.”

Naambile mba, “Mulongo Baxter.”

Aye waambile mba, “Ndekelaiko mambo.”

¹³⁰ Nanchi pano Nayukile mba wajinga yewa nsongwakazhi. Nanchi pano—nanchi juba jalondejilepo, Mulongo Baxter waambile mba, “Mulongo Branham, abo baji kokwa babena kutola bya kuvwala byabo, na kujila.”

Naambile mba, “Lukatazho lwepi?”

Waambile mba, “Kyawama kuyako na kwibamona.”

¹³¹ Naile mu kibaamba kyo bajingamo. Naambile mba, “Baji mung’anyi kibamba?” Naileko konka kabiji nakokosha ku kibelo. Ne bomvwine kasa bajila. Nakonkosheshe pa kibelo, kabiji ne nsongwakazhi waishile ku kibelo, waambile mba, “Oo, Mulongo Branham, Undekeleko mambo.” Waambile mba, “Amiwa na kulengela lukatazho lonse lwe.”

Naambile namba, “Lukatazho? Lukatazho lujipi, nyenga?”

Aye waambile mba, “Oo, Amiwa nalengela ba FBI kwimulondaizha.”

Kabiji Naambile namba, “Oo, abyo ibyo nyi?”

¹³² Waambile mba, “Ee.” Naambile namba, “Naketekela Nakushimuna bingi mu tauni leelo, kabiji ne bintu byonse.”

Naambile mba, “Ine.”

¹³³ Kabiji aye waambile mba, “Mulongo Branham, ba FBI baji konka kwa, baji konka kwa, basakukulengesha buvu bufuku buno.”

¹³⁴ Amiwa naambile mba, “Kyawama, inge Ami—inge Amiwa mbena kuuba kintu kikyatama, Nafwainwa kulengeshiwa buvu.” Mwamona? Naambile mba, “Kine. Inge kusapwila Mamboawama kikebewa kulengeshiwa buvu, kyawama, twayai twikyube.” Mwamona? Naambile mba, “Ami—Ami—Amiwa ngikela ku yuwe Baibolo, kabiji abya bibula kwamba Baibolo... Abwe bo bukikizhi bwami, monka muno.” Mwamona? Kabiji Naambile mba, ne aye... .

Aye waambile mba, “Kyawama,” amba, “Amiwa mundekeleko mambo Pakuuba abya byo Naubile.”

Naambile mba, “Obewa kechi waubilepo kintu nangwa kimo ne, nyenga.”

Waambile mba, “Kyawama, bushe kechi muji na moyo wa kuyako nenyi?”

Kabiji Naambile mba, “Ine.”

Aye waambile mba, “Kyawama, ba FBI kobaji.”

¹³⁵ Naambile mba, “Kyawama, Amiwa najinga nabo mu mbung’eno yami kunyuma kabiji batambwile lupulukilo.” Naambile mba, “Mr. Al Farrar...”

¹³⁶ Kapiteni Al Farrar, bavula ba mwi anweba mwayuka kwaluluka kwanji kokwa ku Tacoma, Washington, wapulukile, ponka pa kulozela mata. Waishile mu mbung’eno, aye waambile mba, “Amiwa na mulondela yuwe muntu pa myaka ibiji. Kabiji Amiwa naumvwi bya mali, kabiji Amiwa ne bimona, kabiji napitamo konse konse.” Kabiji waambile mba, “Ke Bukine, anweba kechi mubena kuteleka ku wabisela bufuku buno ne, anweba mubena kuteleka ku Bukine.” Waambile mba, “Umo wa banabalume ba mu jibumba ja bakapokola, awo Wajinga na dokotala wamwene pa mwaana wanji kabiji wa mutumine mu mulaini wa milombelo,” kabiji waambile mba, “mwaana wabujilwe lonka lukatazho lo aji nalo, kabiji ne kyamumwekejile aye. Kabiji waambile mba, ‘Mu moba eiti ukabwela ku sukuulu,’ lukatazho lwa polyo. Kabiji waambile mba, “Pa juba jabu eiti mwaana wabwelele ku sukuulu.” Waambile mba, “Amiwa namulondela pa myaka ibiji,” ku meso abantu teni sauzande. Abyo byokyajinga... Kuji kipikichala kyakyo, mbung’eno ya ku Seattle, mu—mu buuku wenu. Aye waambile mba, “Nasaka anweba bonse muyuke mba kechi mubena kuteleka ku umo mupopweshi wabubela ne. Anweba mubena kuteleka ku Bukine.” Kapiteni Al Ferrar. Kabiji juba jalondejilepo Namutangijile kwi Lesa, kabiji watambwile

lubatizhilo lwa Mupashi Wazhila, konka ko balozela mata, kukifulo kikatampe kijiko.

Naambile mba, “Kapepo awe muntu wakonsha kuba kintutu kimo.”

Nanchi waambile mba, “Bushe obewa uji na moyo wa kuyako nyi?”

¹³⁷ Naambile mba, “Mooyo? Kika, kechi ibyo ne. Kechi ibyo ne. Kika kyo Nafwainwa kumvwina mooyo inge Lesa ye watuma mba nekyube? Aye ye Iye ulwa makondo, kechi ami ne.” Nanchi Naambile mba, “Pano, Nakeba anweba bonse mufumeko.” Kabiji nanchi...

¹³⁸ Twayile na kupwila bobwa bufuku, aya mpuzha yayujile. Kabiji kalama kokwa walupukile, ne kwamba mba, “Reverend Branham, Amiwa nateula baana bena Mexico teni.” Waambile mba, “Talai kuno, ‘Reverend Branham usa kulengeshiwa buvu bufuku buno kwi ba FBI, wabisela mupopweshi,’ nangwa kintu kimo kiji byobya. Kabiji naambile mba, “Kiji pa yonse myotoka. Bifumyaipo...” Waambile mba, “Amiwa nateula baana babacheche bena Mexico, basa kwibiyokolapo ne kwibitula muno.” Waambile mba, “Oo, Naumvwa nobe Nakonsha kukwata yewa muntu!”

¹³⁹ Naambile mba, “Kechi musakamane ne, mwane. Lesa ukamukwata.” Mwamona? Naambile namba, “Mulekaitu bunke.”

¹⁴⁰ Nanchi aye wayishile. Kabiji abwa bufuku byo twatwelele mukachi, Amiwa kechi ke kilubako ne, watwelele mu lumu. Ami... Mulongo Baxter waimbile *Kuketekelatu Konka*. Aye waambile mba, “Pano, Mulongo Branham waamba mba bufuku buno atweba tulupuke mu kino kishimikwa.” Waambile mba, “Amiwa mbena kubwela kunyuma kwine nakwikala.” Aye waambile mba, “Babena kukeba kumulengesha buvu bufuku buno ku pulatifomu.” Aye waambile mba, “Namumona mu makondo a kosa, kabiji wamona Lesa watola kifulo kyanji.” Waambile mba, “Ami—Amiwa mbena kubwela kunyuma na kwikala.”

¹⁴¹ Amiwa naendele kuyako. Naambile mba, “Nakutanganga sawakya mucheche kuno apo Amiwa po nafwainwa kulengeshiwa buvu kuno ku pulatifomu.” Amiwa naambile mba, “Nakeba ba mingilo ba FBI beye kuno kulutwe na kundengesha buvu kuno ku pulatifomu.” Naambile mba, “Amiwa naimana kuno mu kupana bukikizhi ku Mamboawama; Nakeba anweba mwiye na kundengesha buvu.” Napembejile. Naambile mba, “Kapepo kechi bajì muno ne.” Amiwa nayukile po Naimana. Aye wamwesheshe kala mu lumu wami kokwa, byonse bisakumweka, kasa kyangye kuya, mwamona. Kabiji Naambile, Namba, “Kapepo Amiwa pembeleko pacheche. Twayai twimbe lwimbo

wa mubuuku?" Kabiji muntu umo waishile na kwimba lwimbo wa bunke.

¹⁴² Amiwa naambile mba, "wamingilo Mr. FBI, uji muno mukachi nyi nangwa pangye? Amiwa mbena kupembelela kulengeshiwa buvu. Wakonsha kwiya kulutwe nyi?" Kafwako muntu waishile ne. Natwajijile na kukumya kwepi koaji. Aye Nkambo wambujile byokiji. Kyajinga basapwishi babiji babwela munyuma, kabiji Na—Namwenenga. Namwene kivule kifita wakobama mu koona. Nayukile po kyajinga. Natajile konka kwa, kabiji kyaendele kuya konka kwa ke kyube bibye nobe kipikichala. Mwanamulume umo wamvwajile suti wa bbulu, umo na watokoloka.

¹⁴³ Naambile mba, "Balunda, kafwako ba FBI ne. Ng'anyi mwiningilo uji na ba FBI namambo a kusapwila Baibolo?" Naambile namba, "Kine kechi ibyo ne. Abo kechi bajinga bamingilo babiji kufuma ku FBI bakundengesha buvu ne. Pakuuba, kino kyo kyaletwa patoka, aba baikala kokwa, aba basapwishi babiji baji kokwa." Kabiji bayileko konka. Naambile namba, "Kuyako koko byobyo ne." Kabiji babiji ba mwi abo babaya bena Texas bayile konka na kwibakwata. Naambile mba, "Ine, balongo, aye kechi mingilo ya ku mubiji ne mashi ne, anweba ikalaitu. Lesa wayuka mwakwiyubila."

¹⁴⁴ Naambile mba, "Pano, balongo, talai, mu kimye kyo muji koko, talai lulwe-lubaji." Naambile mba, "Inge... Anweba mwaamba mba Amiwa ne Shimona wabingeletezha, Amiwa mbena kulowa bantu." Naambile mba, "Inge Amiwa ne Shimona wabingeletezha, nishi obewa yobe muntu wa kwa Lesa. Pano obewa iya kuno ku pulatifomu. Kabiji inge Amiwa naikala Shimona wabingeletezha, lekai Lesa angipaye mfwe. Kabiji inge Amiwa ne ngauzhi wakwa Lesa, obewa yikila umone Lesa byo asakukwipaya umfwe. Pano tumone uji bulongo ne watama ng'anyi. Pano obewa iya kuno. Tusa kwimba lwimbo." Balupukile kuya byo bafumine mu kyokya kishimikwa, kabiji kechi twibamwenepo jibiji kufuma pa kyokya kimye ne. Mwamona? Nambile mba, "Iyai kuno. Inge Amiwa ne Shimona wa bingelekezha, lekai Lesa angipaye mfwe. Kabiji inge Amiwa ne ngauzhi wa Lesa, nanchi Lesa usakukwipaya umfwe inge wiye kuno ku pulatifomu. Inge Amiwa ne wakine ku meso akwa Lesa, Lesa, Lesa usakukwipaya umfwe konka kuno ku pulatifomu." Abo bayukile bulongo. Abyo ibyo. Abo bayukile bulongo. Baumvwinepo ku mampuzha akwabo. Abyo ibyo. Nanchi kechi mulanguluke bingi ne bino Lesa ukijitu Lesa. Aye ukumbula.

¹⁴⁵ Pano, awe mulozhi wa ku En-dowa, wabwezhezhe mupashi wa kwa Samwela. Kabiji Saulo wisambile ne Samwela. Pano, anweba mwafwainwa kukumya mba akye kyakonsha kwikila byepi. Kechi kyakonsha kubiwa leelo ne. Ine, mwane. Mambo, mashi a bang'ombe ne a bambuzhi a pembejilengatu kufikila

kwa kimye. Kimye muntu kyo afwile mu ooa mooba... Basapwishi, ikalai kunyuma yami inge walanguluka mba Kijitu bulongo. Inge muntu wafwa, aye wafwile mu mfuto ya mambo ya banyama, kabiji mweo wanji wayanga mu Paladise. Kabiji kokwa waikale poso kufika, ku—ku Juba ja Bukuzhi. Kabiji mweo wanji wajinga monka mwa.

¹⁴⁶ Lekai ne mulengele kipikichala kicheche papo. Baanga batangapo sawakya wami, nangwa sawakya ye balembele pe amiwa mu *Reader's Digest* kuno, pepi nobe mu Tundwe, wa kimye kya Kapande? Kijitu bulongo. Bushe mwamona byo kyajinga nyi? Bushe mwamwenepo, pepi nobe milungu ibiji nangwa isatu kasa kikyangye kufika ne, awe mukatampe wayankuwa wisamba na bapashi kuno ao waesekwa pa kimye kyabaya kyapitapo, aye, Miss Piper. Bushe pajipo muntu umo watangile kyokya, sawakya wa kwa Miss Piper mu *Reader's Digest*? Bushe kechi kyenyi ne aya mipashi ibiji...

¹⁴⁷ Njina kimye kyabaya byepi Amiwa? Kafwako ke ka kimyetu kacheche. Amiwa napitaila pa tweti, bino Nafwainwa kupelawizhako. Nayuka namba muji na... Talai, ndekelaiko mambo pa mineti umo.

¹⁴⁸ Anweba mwayuka, kuji—kuji bubela. Kuji kine kabiji ne bubela ku bintu byonse. Inge Nakupa dola, kabiji Naamba namba, “Bushe yuwe dola wawama?” Kabiji mwakonsha kutalapo, wakonsha kumwekatu nobe dola wakine inge ne kechi wakonsha kwikiswa ne. Abyo ibyo nyi? Nanchi kyakonsha kwikalaka kusombolola kwawama bingi.

¹⁴⁹ Kabiji inge Yesu waambile mba aya mipashi ibiji mu mooba akupelako ikekala ipasha bingi kyakuuba mba bakajimbaika bonka Basalwa inge kyakosheka kubiwa, bantu bapopweshi. Pano vulukai. Pano, kechi mujipo kintu kimo mwi abo ne mwakala mu-...mwa-...mwatalala, kipashatu. Pangye bajitu na musango wa bulesa, mwamona. Pakuuba aaye mipashi ibiji, mipashi iine iine, ikekala pepi bingi kyakuuba mba yakonsha kujimbaika ne bonka Basalwa, byo bakengilanga lubaji na lubaji mu mooba akumpelo. Bushe Yesu waambile kyokyo nyi? Aye wikyambile.

¹⁵⁰ Pano talai, balunda, Amiwa nsakwimulengela kipikichala kicheche. Nasaka namba anweba mutale kuno pa kamineti kamo. Kabiji mpai matwi enu, mambo Amiwa mbena kwimupa kishipi, kabiji po musakwikimona.

¹⁵¹ Pano, mu *Reader's Digest*, kyanembwa popa, Amiwa naimene kokwa, twajinga na bantu tweti sebeni aduleendi bapembelejilenga kulombelelwa, baimene byobya. Anweba tangai sawakya. Kabiji muntu umo wafumine ku Canada, kabiji aye wajinga na nsongwalume ao wayapo kala ku Mayo ne Johns Hopkins, kikola kyatama bingi kya kubongo kyatwezhezhe maboko anji *bibye*, kabiji watwezhezhe mikupa yanji mukachi.

Kabiji baambile mba, “Kafwako nangwa kutumbula nangwa kintu kimo kyakonsheka kubiwa ne.”

¹⁵² Nanchi aye wamubwezhezhe ku Canada. Aye waambile mba, “Amiwa kechi na kipumwa ne.” Anweba tambulai kya lupwilwe mu Kapande kya mu *Reader's Digest*, kabiji kyatelwa mba—mba—mba *Aky Kyakukumya kyakwa Donny Morton*. Kabiji—kabiji pano waambile mba, mukachi, amba aye—amba aye mwanamulume waambile mba, “Amiwa kechi na kipumwa ne, mambo Nayuka ubuka na lwitabilo watelwa mba William Branham, ye walengejile balunda nami babiji bajinga bakamama kechi baambanga nangwa kumvwa ne.”

¹⁵³ Kabiji baichile mba beseke nkutumina bamone kana Njipi, mu—mu America. Kabiji Amiwa najinga ku Costa Mesa, California. Kabiji wajinga sawakya, inge mwamutanga, inengetzhe kujila. Kyakonsha kulalatu muchima wenu. Byo apichile mu mabebe amashika, kabiji ne bintu bikwabo, nayewa mwaana! Aye waambile mba, “Ujimuke, Donny.” Waambile mba, “Bino, kechi twashindwa ne.” Kabiji nsongwalume mucheche kechi wamwemweselenga ne, nangwa pacheche ne, aye wamanyikilwe bingi. Waambile mba, “Atweba kechi twashindwa ne, tusakulomba Lesa. Tukaya ku ngauzhi wakwa Lesa na kumwipuzha.”

¹⁵⁴ Nanchi pano baishile kupita mu mabebe amashika. Kabiji kyapeleleko bafikile kokwa, kabiji ba inanji baishilenga nabo, kabiji kechi bajinga na mali akuyila mu ndeke ne, nanchi bainanji be babwezhezhe. Kabiji nsongwalume ne bashanji baishile na sakya, kabiji baendele musinso yense kufuma ku Winnipeg, Canada, kuya ku Costa Mesa, California. Kabiji bafikile kokwa, bapya, kabiji bashanji babulang'enenga byo bapipwilenga matebela aacheche, nsongwalume wa mucheche pepi nobe sebeni nangwa myaka eiti, wajinga wabula bukwasho. Kabiji aye byo aubilenga . . . kechi wajingapo na kimye kya kuja nangwa kintu kiji kyonse ne, kabiji waambile mba nsongwalume wanji wamuchecche aye wa mumvwinga kwamba. Kabiji aye wakonsheshe kubulang'ana monka mutajile ya meso anji, amba aye wajinga—aye waeskelenga ku mwemwesela, mwayukatu. Kabiji yukai mba aye . . . Aye wakonsheshe ku mubuula bifulo byapusanapusana byo amwenenga, amwa mu America.

¹⁵⁵ Kabiji byo bafikile kokwa, ku California, baambile kuyewa ukwasha bakang'enda, kyo aendela kumona. Aye waambile mba, “Naiya na kumona kya Bulesa kika?” Kabiji ne jipuzho jabaya bingi.

¹⁵⁶ Mambo, mwakonsha kulanguluka America byo aambil pa kyokyo, mwamona. Mwamona, ao ye atweba, mwamona, “Atweba twajimuka bingi! Atweba twayuka bintu byonse, mwayukatu, kabiji kafwako kwitubuula nangwa kintu kimo ne. Atweba tuji nabyo byonse byanembwa.” Mwamona?

¹⁵⁷ Nanchi pano, nanchi, “Awa Wabuulesa kika? Kufuma konse kwalepa ku Winnipeg, Canada?” Kika, balangulukile mba akya kyajinga kyatama bingi.

¹⁵⁸ Nangwa byonkabyo, motoka ye balamikilepo kipepala kya majashi ye—ye batumineko kuya kokwa. Kabiji aye waambile mba, byo bafikile ku mulaini, poajinga, waambile mba bantu tweti—sebeni aduleendi bapembelejilenga kulombelelwa. Bino waambile mba, byo bamwene awa kilema, nsongwalume ubena kumweka—bucheche, ne yewa taata kamulanda wamvwarzile kisochi, nakonchi wanji watabauka, waambile mba bantu bonse bafuminemo ne kumupa mpuzha. Byo afikile pa pulatifomu...

¹⁵⁹ Mizophilo kechi yaswisha ku kinganya kitupa kya milombelo ne. Muntu wafwainwa kwiya ku mbung’eno ne kutambula kitupa kyobe. Inge bakukwata mu mulaini, nakupipuzhanya bitupa byamilombelo na muntu mukwabo, akya kitupa kechi kiswishiwa ne. Mwamona? Mambo wafwainwa kwiya ne kumvwa mafunde kabiji ne kuyuka mwakwikitambwila. Kijitu kwi obewa. Obewa kechi wakonsha kutambwila muntu ungi ne. Obewa mwine wafwainwa kwiya na kwikitambula, pakuuba mba umvwe. Muntu umo wabaya waambile mba, “Inge... Kyawama, Amiwa kechi naketekela pabaya mu kikye kintu ne. Bino, kapepo inge Aye usa kumbuka, Amiwa...” Mwamona? Kabiji akya kilengela lukatazho pa pulatifomu, nanchi bekikanyatu akya kintu kasa kikyange kufika kokwa.

¹⁶⁰ Nanchi kimye nsongwalume kyo atatwile, nangwa bashanji byo atatwile kuya ku pulatifomu, kulutwe ya bantu, Billy wamwipwizhe kitupa kya milombelo. Aye kechi wajinga nakyo ne. Waambile mba, “Nanchi Amiwa mundelekeko mambo, mwane.” Waambile mba, “Obewa wafwainwa kupembelela.”

¹⁶¹ Aye waambile mba, “Kijitu bulongo.” Waambile mba, “Amiwa nsakupembelako.” Waambile mba, “Amiwa sakupembelela kimye kyami nobe bakwabo bonse, nanchi.” Waambile mba, “Amiwa kechi nayuka mba Nafwainwa kuuba kikye ne.”

¹⁶² Kabiji nanchi Amiwa naambilenga na muntu umo, Amiwa nekyumvwine. Namwene bashanji ke bafumeko, kabiji Naambile mba, “Lukatazho lwajinga ka?”

Waambile mba, “Aye kechi wajinga na kitupa kya milombelo ne.”

Kabiji Kintu kimo kyaambile kwi amiwa mba, “Mubwezhai kuno.”

¹⁶³ Nanchi Naambile mba, “Muletai kuno.” Kabiji bashanji baishile, ne mipolo kasa ibena kupita mu kilungi kyabo, kya kebelenga kutendwa. Kabiji aye—aye waendele kwiya, kabiji papo *Reader’s Digest* waambile mba. Mwamona? Amiwa kechi Naipwizhepo jipuzho ne, pakuuba natajiletu monka mu kilungi

kya mwaana, ne kubuulang'ana kwafuma mwaana, wajinga ku Moyo's Kiliniki, kabiji ne lukatazho lonse lo aji nalo, ne kukolwa kwaikala bimye binga, kabiji ne bintu byonse.

¹⁶⁴ Kabiji nanchi bashanji batatwile kujila, ne kutatula kufumako. Kabiji waambile mba watatwile kufuma ku pulatifomu, kabiji waalulukile, ne kwamba mba, "Abyo ibyo, mwane." Aye waambile mba, "Bino mwanami ukekala na bumi nyi?"

¹⁶⁵ Naambile mba, "Akyo kechi Nakonsha kwamba ne." Naambile mba, "Pa kakimye kachechetu." Namwene kimwesho. Naambile mba, "Anweba kechi mukeba kuketekela kikye ne, mambo bena Moyo ne Hopkins bonse baamba mba kutumbulwa kechi kwakonsheka kubiwa ku bobwa bongo ne, pakuuba Amiwa ne mubuula byo mwafwainwa kuuba. Anweba, keesha, mukayengatu na yuwe mwaana. Pa moobatu asatu mu kakumanya mwanamukazhi wafita-mutwe mu mukwakwa, kabiji awa mwanamukazhi ukemwipuzha lukatazho luji pa mwaana. Kabiji pano aye ukemubuula dokotala umo wachepa mubiji ao ukengila kutumbula kwa mwaana, kabiji kechi mukasaka kwikitabizha ne, mambo a kuuba mba ba Moyo bakakelwe ne kwamba mba, 'Kechi kyakonsheka kubiwa ne.' Pakuuba ajo jojoka jishuko mwaana wenu joaji najo, kupichila mu bulume bwa Lesa, lusa lwa Lesa ne kokwa kutumbulwa. Pano, inge waketekela amiwa kwikala ngauzhi Wanji, yanga ukoobe monka mo Nakubujila." Kijitu pamo nobe kubika mabula a mukuyu pe Hezekiya, kabiji ne bikwabotu.

Aye waambile mba, waalulukile ne kwamba mba, "Nemusachila." Wafumineko.

¹⁶⁶ Mooba abiji nangwa avula apichile, kabiji aye wajinga mu mukwakwa juba jimo, kabiji inetu umo waishile, waambile mba, "Lukatazho ka luji na mwaana wenu?"

¹⁶⁷ Waambile mba, "Uji na—na kikola kya bongo." Kabiji aye wailenga na kwamba byonkabya. Kabiji, kyawama, abo—abo balangulukile mba kyatama bingi, mwayukatu.

¹⁶⁸ Nanchi aye waambile mba mu maminetiacheche kintu kimo kyaubiwe. Mwanamukazhi waambile mba, "Mwane, Nayuka muntu umo wakonsha kuba kukwe kutumbula."

¹⁶⁹ Aye waambile mba, "Inetu, talai, Balongo bena Moyo bakakelwe kabiji baambile mba kechi kyakonsheka kubiwa ne." Waambile mba, "Muntu umo walombelenga nanji, watelwa mba Mulongo Branham." Waambile mba, "Aye walombelejile mwaana." Nekwamba mba, "Pembelaiko pa mineti umo! Mutwe-ufita, wamvwala konchi wa suti watokoloka." Waambile mba, "Awa iye." Waambile mba, "Kwepi kuji yeo dokotala?" Kabiji wamubujile. Wamutwajile konka kabiji ne dokotala waingijile akwa kutumbula, mwaana waikeletu bulongo.

¹⁷⁰ Pano, akyo kyaishile kupichila mu *Reader's Digest*, mwamona. Kabiji ba Moyo Brothers bangichile na kutebausha pakyokyo. Waambile mba, “Rev. Branham, kika kyo waubile ku mwaana?”

¹⁷¹ Naambile mba, “Kafwako. Amiwa kechi na mukwachilepo ne. Amiwa nabulang'enetu byo ambujile Lesa. Awa mwanamulume wikikokejile.”

¹⁷² Pano, kintu kyatamako pa kikye, pepi nobe milungu ibiji palutwe, nangwa milungu ibiji kikye kasa kikyangye kubiwa, nangwa isatu, mu *Reader's Digest*, kapepo ng'ondo umo palutwe, sawakya wa ba Miss Piper wamwekele. Pano, awa ke mulozhi mwine, nangwa wisamba na bapashi. Bino, kuji wakine, kabiji kuji ne umo upashang'anyatu. Baikala nayewa mwanamukazhi kufumatu mu 1897. Uji na myaka yakila pa aduleendi pa kino kimye, mu New York, bonse babiji... kyanembelwe kya kishika matwi. Mu *Readr's Digest*, tumbulai... Naketekela kyamwekele pepi nobe bang'ondo babiji nangwa ng'ondo umo kyami kasa kikyangye kubiwa; mwakonsha kwikitana, mu mooba atanshi a kimye kya lutempu. Mr. Baxter wajinga nakyo kuno juba jikwabo. Inge Amiwa ne kilangulukile, Amiwa nge namwambijele... nangwa inge Nayukile mba nsakwamba kikye, Nakufwainwa—Nakufwainwa kwikala nakyo. Nakonsha kwi mutambwilakyo. Kabiji kyasendele twelufu nangwa mapeje footiini. Aye wajingatu mukazhi wa muntu. Kabiji waponejile mu kimwesho, kabiji byo amanaminenga, watatwile kwamba ku bafwa. Kabiji batanwa na yewa mwanamukazhi pa ntanda ponse, konse konse. Bamutwajile ku Mangalande. Bapipwile bya kumvwala byanji, bimye byavula, pakuuba mba bamone kana kyajingatu kilubo ne bintu bikwabo, kabiji wafikile kokwa ne muntu umo wifile pa kumvwala kintu ku kilungi, mu Ngiliki, kabiji wimwesheshe nobe wajinga muntu mwina Mangalande. Kabiji aye wamubuujile byonse. Kabiji aye—aye—aye wakebele kumwichila mulunda nanji umo wafwa.

¹⁷³ Pano, kintutu kimo aye... Pantanda ponse, kabiji kuno *Reader's Digest* waambile kokwa, amba kuno mafuku apitapo acheche, nangwa bang'ondo bacheche bapitapo, kimo kya mubibye bintu kyalengeshiwe buvu. Mwanamulume wafyompele kyafwainwa kwikala kipuku kya bainanji, kabiji juba jalondejilepo kya shinikishiwe ku bakapokola mu kinje amba wafyompeletu kisapi kya kuzhika pa mukaka. Bantu bavula bepashang'anya kwikala besamba na bapashi! Abo ke booba bakulumpe bakala batanga bekala kwapela mukwakwa, kyakutatwilapotu kechi besamba na bapshi ne. Kafwako byo baji ne ke bipashang'anya byabubela. Pakuuba koaji mwine wisamba na bapashi.

¹⁷⁴ Kabiji atweba twi bantu bapopweshi, tuji na bavula bapashang'anyatu ku mbanji yonse ibiji. Pano ngikalaiko pa maminetiacheche.

¹⁷⁵ Pano monai, awa Miss Piper ke wakine wisamba na bapashi. Kabiji magazini waambile mba, "Akino ke kintu kimo kyakuketekela, amba, umvwe muntu wafwa, aye kechi wafwa ne. Aye ubena kwikala kuntu kukwabo, mambo awa mwanamukazhi ubwezha mipashi yabo kabiji ne kwamba ku bantu."

¹⁷⁶ "Pano, uba byepi, Mulongo Branham? Bushe wikiketekela nyi?" Ee, mwane. Aye Baibolo byobyo aamba, ao oene mambo o Nekiketekela. Kabiji aye ke wakwa diabola. Kwisamba na bapashi ke bujimuku bwa kwa diabola. Pano monai, bamonai bonse babiji.

¹⁷⁷ Kabiji pano mwafwainwa kumona makalata byo aishilenga kwi amiwa, nanchi, kimye jashi jami kyo jalondejile janji. Kechi kyenyi kyakuuba mba, kimye kya kupelo kasa kikyengye kufika ne, Lesa wibyambile bibye bintu? Kabiji *Reader's Digest* unembwa mu milaka yonse pano pansi. Mwamona? Monai, kechi kyenyi ne kyakuuba mba bilondejile kimo na kikwabo?

¹⁷⁸ Pano makalata ke eye, kwamba mba "Mulongo Branham, akye kishinikisha kuuba mba obewa kafwako byo uji ne wisambatu na bapashi." Baambile mba, "Akye ki kishinikisha. Talai papo, wabujile yewa mwanamukazhi ko akatana . . . Talai pa *yuwe* mwanamukazhi?"

¹⁷⁹ Naambile mba, "Pembelaikotu pacheche." Amiwa njina kalata yaswishiwa, (ndekelaiko mambo), pa kutuma ku bantu. Naambile mba, "Anweba basapwishi mwayuka bintu bicheche." Naambile mba, "Mukifulo kya kubatizha mubiji obe, anweba mubena kukeba kubatizha bongo bwenu." Abyo ibyo. "Anweba kechi mwimana mwalanguluka pa bintu ne. Anweba kechi mupima bintu ne."

¹⁸⁰ Ajo jo jishinda jimo jo baubijilemo ne mu mooba akwabo. Abo bamwene Yesu. Abo bayukile mba Aye wakonsha . . . Aye wayukile byafyamika bya mu michima yabo. Aye wayukile kyo baubijilenga byobya. Kabiji baambile mba, "Aye mukulumphwa badiabola. Aye ye Belezebuba, wakijisha kubulang'a lutwe lwa muntu pano pantanda." Abo kechi baimene balangulukapo ne, pakuuba mba bamone amba wajina Mwaana wa Lesa. Abo kechi bajinga babumupashi pakuuba mba bekuyuke ne. Byokiji, abo batanga peulu ya kintu. Kine, Yesu wafwaijilwe kwiya mu Yelusalema, kasa enda pa myule, kabiji ne bikwabotu, bino abo babena kupembelela Kwiya kwa bubiji.

¹⁸¹ Kabiji kintutu kimo leelo! Abo babena kutajila peulu ya kintu kine. Aleluya! Abyo ibyo. Nayuka mba Lesa uji muno, mute uno, kabiji Nayuka mba Mbena kusenda kimye kyenu kyabaya, bino obewa wafwainwa kumona kikye, mulunda. Inge Amiwa nabula kukumona jibiji, obewa wafwainwa kuyuka bademonia byo baji, obewa wafwainwa kuyuka Bukine ne kilubo byobiji. Kabiji biji pepi bingi, wafwainwa kwabanya bintu.

¹⁸² Pano vulukai, kechi kikekala pangye byobya ne, kintu kimo kiji ku *lulwe* lubaji nobe ba Faliseo, nangwa kintu kimo kiji kunyuma ku *lolwa* lubaji. Kijitu ponka pano pa kibelo, ponka pepitu. Kitalai. Pano inge Natola . . .

¹⁸³ Twayai tusende ao mambo abiji. Inge Natola ne kukupa dola, pano, inge Nakupa dola wabubela. Tusa kwingijisha kishipi pakuuba mba mwikimone. Kintu kitanshi kyo wakonsha kuuba, inge wi muntu wajimuka, inge watola dola kabiji watalapo, kintu kitanshi, wakonsha kwikyumvwa kabiji ne kumona kana kyalengwa ku ng'anyi kintu. Abyo ibyo nyi? Obewa watala ku kyokya kyo kyalengwako. Obewa wakonsha kumona kumunema wakyo. Dola wakine kechi walengwa ku kipepala ne, lubaji lumo kipepala ne kisapi kyalelema, mwamona. Kabiji kintu kitanshi, obewa wakonsha kumona pa mutengo wakyo. Ako ko kayukilo katanshi.

¹⁸⁴ Kabiji pano twayai tumutoole mwanamukazhi ku *lulwe* lubaji; ne kutoola Nkambo ku *lulwe* lubaji, ao ubena kwingila ne atweba.

¹⁸⁵ Pano talai, kintu kitanshi kyo mwakonsha kumona, bintu byonse . . . Mona jishimikila jobe. Pa myaka fifite-ne ikwabopo ya kuyuuka-lutwe lwa bintu, kabiji ne kwita mipashi ya bafwa, aye kechi wakitongolapo kala Lesa, Kilishitu, lubuko lwa Bulesa, bupokolweshi, Buchibishi bwamambo ne, nangwa kafwako. Kechi kujipo kintu ne kanatu kukaya ne kubulwa kulanguluka bulongo.

¹⁸⁶ Bino ku *lulwe* lubaji, kimye kyonse Lesa, Luzhachisho, Kwiya kwa Yesu, lubuko lwa Bulesa, bulume bwa Lesa, bupokolweshi. Talai pa munema wakyo. Anweba kechi mumona bayuuka lutwe lwa bintu ne balozhi kusapwila Mamboawama ne. Lukatazho luji na bantu? Ami! Monai!

¹⁸⁷ Kabiji kine kintu kyakuuba, inge mukeba kutuluka kana dola wakine nangwa ine, inge wamweka kwipasha nobe iye, fumyaipo manambala ne kwi atuma akwa kulengwa mali. Kabiji inge paji manambala epasha na kyokyo, kuji dola wa siliva ubena kumupembelela. Abyo ibyo nyi?

¹⁸⁸ Kyawama, nanchi, mulongo, sendai aye byo aaubile ne kubwezha ku Baibolo, mukatana mba ke mulozhi wa ku En-dowa.

¹⁸⁹ Kabiji mwatola biji kuno, mukekitana kunyuma, kiji mu Buuku mumwe mo Bitanwa, "Yesu Kilishitu ujitu pamo keesha, leelo, ne myaka yonse." Kyakine, mingilo Yanji! Aye kechi waile na kuuba byabulamo milanguluko ne maana na bantu ne. Kyajingatu kyawama, kya kukwasha muntu umo, ne kwibatangijila kwi Nkambo. Amena! Amiwa kechi mbena "kwiuba ameni" amiwa mwine, pakuuba *amena* kyalumbulula mba "kikale byonkabyo." Kabiji Amiwa . . . Naketekela mba Byokiji. Amiwa nayuka mba Kya Bukine.

¹⁹⁰ Pano monai, kiji bino. Pano, bukiji bukiji, mambo Amiwa kechi mbena kukeba kwimulama kuya kulutwe ne.

¹⁹¹ Apo, twayai tupanepo kipikichala kicheche, kipikichala kicheche kya mubongo. Awe ke mukola wapita papo, kupita *ku* kukwe, kupita mwaya bumi. Pano monai. Ke ndonda. Mpai maana enu onse pa kino kimye, pakuuba mba kechi mwakonsha kupusa kikye ne. Kuyatu kulutwe nobe *bibye*. Pano, mu iye ndonda mumwe mwikalala myeo yumi, anweba ne Amiwa. Pano, monka mukachi, twayai tumone byokiji. Ke bintu bibula kulanguluka bulongo kabiji ne bintu byonse bikwabo, bino mu kimye kimo wakonsha kumona kyeya. Umona kyafita ne mikwakwa, ko kuuba mba byakusangalala ne byakutwajijilanyo, badiabola kukwata bantu. Oo, bamvwala bulongo, ami, kabiji byubilo bya peulu, bafunda masukuulu, bino nangwa byonkabyo diabola. Bino muji ne basemwa-jibiji baikalamo.

¹⁹² Bino, abo bantu mu iye ndoonda bongolwa kufuma ku mbaji ibiji yapusana. Pano, kululwe lubaji kuya *kukwe* ku-lubaji, kuji bibese bisatu. Kabiji kululwe lubaji kuya *kukwe* ku-lubaji, kuji bibese bisatu.

¹⁹³ Pano, inge, uji pakifulo kitanshi, ku *lulwe* lubaji, kuji myeo ya *babula koloka*, umvwe muntu wafwa uya mu kikye kifulo na kupembelela kuya ku kije. Yesu waile na kusapwila kuyoya myeo iji mu kaleyia momwa. Balondelapo ke bademona. Kyalondelapo, ke diabola mu kalunga ka bafu. Kuya peulu, kitanshi, pano, abo baji momwa ke mipashi, mipashi ya bantu bafwa babujile kulapila. Babena kupembelela Kije. Kintutu kimo kyo bayuka ke kubula kulanguluka bulongo kabiji ne byubilo byo baubile.

¹⁹⁴ Pano, peulu papo, abo Benakilishitu bongolwa kufuma Peulu. Akye ke kishipi. Apa peulu ke Mupashi mukwabo, Mupashi Wazhila, Mupashi wa Muntu, Kilishitu Yesu. Aye Mupashi Wazhila, Mupashi Wazhila ongola Kipwilo Kyanji mu kikye kibese kya bomi.

¹⁹⁵ Diabola, mu *iye* mipashi, ongola muntu. Pano, talai, balondelepo ke Bamalaika. Walondelapo ke Lesa. Pano, mumi yense ongolwa ku umo wa iye ntnada. Mwamona mo Nekitazha nyi?

¹⁹⁶ Pano kyaubile yewa mwanamukazhi, aye watwelele mu kyokya kibese. Kabiji ubena kwamba ku booba bantu bayujilwemo-bademona, kutatwi, mipashi ya boba bamalaika baponene babujile kulapila kunyuma konkwa mu ntendekelo, kabiji baswishishe bu muntu bwabo kwikalamo. Kabiji babena kupembelela Kije.

¹⁹⁷ Kabiji *baabo* baji kukwe bongolwa kabiji basemwa jibiji ku Mupashi wa Lesa. Kabiji diabola uji na bangauzhi banji, kabiji Lesa uji na Banji. Mwamona mo Nekitazha nyi? Ke bongozhi, kabiji byobyo kikala. Lekai kwibyabanya. Yesu, Aye byo ajinga pantanda...

¹⁹⁸ Pano, leelo, kechi wakonsha kutwela mu kyokya kibese kabiji wafumyamo muntu waoloka mu kyokya kibese ne. Aye kechi wakonsha kwikyuba ne, mambo bantu baoloka kechi batanwamo mo batanwanga ne, mu Paladise. Ine, mwane. Paladise bamufumisheko, kimye Mashi akwa Yesu byo amufumishepo. Talai kuno. Ami!

¹⁹⁹ Inge Nalanguluka Yesu byo aubile, kimye kyo Afwile, Aye waile na kusapwila ku myeo iji mukaleya. Aye wafwile, ndengamambo, kwakubula kuyuka bubi ne, nangwa byonkabyo bubi bwetu bwajinga pe Aye. Kabiji Lesa, namambo abubi Bwanji, Wamutumine mu kalunga kabafu. Aye Baibolo waamba mba, "Aye waile na kusapwila ku myeo."

²⁰⁰ Bantu bamo baamba mba, "Mulongo Branham, Amiwa kechi ne kyumvwisha bulongo ne." Waambile mba, "Yesu wasangukile pajuba jabusatu. Aye wafwile Pakitanu mabaanga kabiji ne kusanguka pa Mulungu lukeelo, kika, Aye wafwiletu juba jimo."

²⁰¹ Aye waambile mba, "Monka mu kyokya kimye," mambo Aye wajinga na Kinembelo kimo mu Baibolo, Aye kyo aimenepo. Mambo, Davida, muntu wabwelele panyuma palutwe, bino aye wapulukile, bino ngauzhi watundaikwanga na Lesa, waambile mba, "Amiwa kechi kaleka mweo Wanji mu kalunga kabafu ne, nangwa Amiwa nkuleka Umo Wazhila Wami akamone bubole ne." Kabiji aye wayukile, moba asatu ne mafuku, amba awa mubiji wakonsha kwikala mu buubole. Kabiji Lesa waubile monka mwaambijile ngauzhi amba, "Aye kechi ukamona buubole ne." . . . ? . . . [Kafwapo bijipo pa tepu—Waku.]

Aleluya! Aye watolele Kyambo kya Lesa. Aye washijile Satana, kimye kyonse, Nakyo. Aye washijile lufu, pa Kyambo kya Lesa. Aleluya! Aye washijile lufu. Kabiji byo bamwipaile Aye, kabiji Aye wafwile, ndengamambo, bubi bwami ne bubi bobe bwajinga pe Aye, Waile pansi, Nakonsha kumumona Aye kukokosha pa kibelo popa.

Kabiji aya myeo yalubile waishile ne kwamba mba, "Kyawama, Yobe Ng'anyi?"

²⁰² Aye waambile mba, "Kika kyo mwabujile kuteleka kwi Inoka? Kika kyo mwabujijile kuteleka ku bakwabo bangauzhi basapwjlenga?" Bajinga bazhatwa. "Amiwa ne Mwaana wa Lesa kimye kimo wajinga na bumi. Amiwa njina . . . Mashi Ami aichikile. Naiya na kwimubuula, Amiwa nafikizha, aby byaambile bangauzhi mba Amiwa nkoba." Wapichile ku-kiluka ba demona, kufika ne mukalunga ka bafu, ne kutambula ba kii balufu ne bakalunga kalufu kufuma kwi diabola, wiakobekele kulubaji Lwanji, watatulako ne kubwela. Aleluya!

²⁰³ Kubuka lukeelo kelo. Aleluya! Twayai tulenge kipikichala papo. Kumanyashi lukeelo kelo, kuji jibumba jikwabo jajinga mu Paladise. Kechi mobakiji pakino kimye ne.

²⁰⁴ Pano, anweba balunda ba Katolika mukatampe mwaketeleka mu misashijilo ya bazhijikwa. Inge ubena kwamba ku wazhijikwa mu kipwilo kyenu, awa muntu ndengamambo, aye uji mu ngehenen, nangwa—nangwa ubena kupembelela kubushiya bwa luzhachisho lwanji. Kabiji inge wajinga wazhijikwa, aye uji mu lukumo lwa kwa Lesa kabiji kechi wakonsha kubwela ne. Abyo ibyo. Nakonsha kushiniikisha kyokyo. Mashi aba ng'ombe balume kechi akonsha kufumya bubi ne, kanatu Mashi akwa Yesu oabanya bubi.

²⁰⁵ Nakonsha kumona Yesu kuyako akwa kuji, Paladise, muji Abulahama wakala, Izaka ne Yakoba, kabiji ne abo monka, Samwela ne bonsetu bashala bajinga monka. Nakonsha kumumvwa Aye kukokosha pa kibelo. [Mulongo Branham wakokosha pa pulupiti—Waku.] Amena! Oo, Natemwa kikye. Mbenya kumvwa bulongo...ng'umvwino ya bupopweshi pano. Nakonsha ku mumona Aye kasa atala kokwa. Nakonsha kumumvwa na kwamba mba, “Ing’anyi uji kokwa? Ing’anyi Uji koko?” Aye waambile mba, “Amiwa, uno ye Abulahama ubena kwamba. Ing’anyi Ujiko?”

²⁰⁶ “Amiwa ne Lukunwa wakwa Abulahama.” Amena. Nakonsha kumona Abulahama waiya ku kibelo, washikula ku kibelo. Aye waambile mba, “Amiwa ne Lukunwa wakwa Abulahama.”

Danyela waambile mba, “Talai kokwa! Kuji Jibwe jo Namwene kufuma ku mutumba.”

²⁰⁷ Nakonsha kumvwa Izikyo kwamba mba, “Awa Ye iye! Amiwa na mumona Aye, uji nobe lukungu mushi ya maulu Anji, makumbi abena-kwenda, mu kimye mikoko ilume... baimbile mapi abo, mabuula, kabiji bonse babijikile.” Oo, Nakonsha kumona bapusanapusana momwa mu Paladise, na kumupembelela Aye.

²⁰⁸ Nakonsha kumumvwa Aye kwamba mba, “Iya kuno! Ke buye na kukya mu Yelusalema. Twafwainwa kufumamo muno. Atweba tubena kuya, mambo anweba mwaketekejile mu mashi a bang’ombe balume ne bambuzhi, kupembelela kimye kya Mashi Ami. Bino Mashi Ami aichikile ponka pa Kalvali. Amiwa ne Mwaana wakwa Lesa wamvwala mubiji. Bubi bonse bwalipijilwe. Tuji mu jishinda jetu!” Aleluya! Lukumo lwikale kwi Lesa!

²⁰⁹ Nakonsha kumona Abulahama kukwata Sala pa mukoko, kabiji kebeye, ponkapotu! Mu Mateo 27, byo alupukile, Nakonsha kwibomvwa kwimanako pacheche mu Yelusalema. Kabiji kintu kitanshi mwayukatu, Nakonsha kumona Kefasa ne bakwabo kasa baimana pa mukwakwa, na kwamba mba, “Baambula mba awa muntu wasanguka. Kwamba mba, ing’anyi awa muntu ubena kuya kokwa; awa mulunda mwanyike, awa nsongwakazhi mwanyike?”

²¹⁰ Kafwako bakote ne jikwabo ne; awa wajinga Abulahama ne Sala. Kabiji bazhimang'ene. Bakeketa, "Muntu umo ubena kwitumona." Bazhimang'enetu nobe Aye byo apichile mu kibumba, musango wa mubiji umo. Aleluya! Ibyo. Abano bonse bangauzhi ne bakwabo, kwendauka, na kukeketa mwaya muzhi.

²¹¹ Kabiji Yesu wibatangijile kuya mwiulu, nangwa kukila tubaabangabanga, ng'ondo, makumbi, wasendele tundu, wapaine bya bupe ku bantu. Yesu waikala leelo ku kilujo kya Shanji, wakajijile mwiulu, waikele, poso bonse balwanyi Banji baauluka ke kya kunyatapo maulu Anji.

²¹² Kabiji Leelo, balunda batemwe bami Benakilishitu, bademona babena kwingila pa kuboko konse. Kabiji Mupashi wakwa Lesa ubena kwenda, na kuboko ku kwabo, pakuuba mba kikale kyashindwa kimye kyonse. Aleluya! Abyo byokiji. Mapepala a byambo ne mabuku amasawakya kabiji ne bintu bikwabo bibena kwikisolola. Babena kwikimona. Kechi bakonsha kumona byo kiji ne. Kyo kika? Ke kumwesha kivule kya kubekya kukatampe kubena kwiya katatakatu, pakachi ka Lesa ne diabola. Ikalai kulubaji lwa kwa Lesa kabiji wikale waoloka mu muchima obe. Amena.

²¹³ Kuno kechi papita kimye kyabaya ne Amiwa najinga ku Toledo, Ohio, najinga na mbung'eno. Amiwa mbena kushika.

²¹⁴ Anweba mwamona mo Nalumbulwila na mambo abademona? Babena kwingila. Bajibingi ba bupopweshi, baikala ba bupopweshi! Oo, bay aukipwilo kila Mulungu, balapila ne kupituluka mu Mafunjisho a Batumwa, kabiji ne kwimba Nyimbo yakutakaika. Oo, ami, bakela babupopweshi byonka byo bafwainwa kwikala!

"Mulongo Branham, ubena kumbula mba bo Bukine?"

²¹⁵ Awa ye musango wa mupashi wakobekele Yesu Kilishitu pa musalabu. Kabiji Yesu waambile mba, "Anweba mwiba kwa shenu, diabola."

²¹⁶ Bino bambo baambile mba, "Oo, Russia ke antikilishitu." Ine! Russia kechi ye antikilishitu ne. Aye antikilishitu ukekala wa bupopweshi kyakuuba mba ukajimbaika bonka Basalululwa inge kyakonsheka kubiwa.

Vulukai, Lesa ufumyapo muntu Wanji, bino Mupashi Wanji ne. Aye diabola usenda muntu wanji, bino mupashi wanji ne. Pano, abylo byobaji. Ngiyieseke obewa mwine. Amiwa kyami kwamba Bukine.

²¹⁷ Bademona, kwingila! Keesha, Najinga nabo mu kibese kya kumubiji. Leelo, Amiwa mbena kwimumwesha kibese kya bumupashi, kwepi kobaji mu kibese kya bumupashi. Kwepi kobaji kokwa, watelwa mba kaasa, kabiji bamutela mba *kikye, kyokya*, kabiji ne *bakwabo*, pakuuba Nashinikisha kwi anweba, na Baibolo, amba badiabola. Pano, kuno, leelo, baji kuno

ne jikwabo mu kibese kya bupopweshi, babupopweshi bingi, bakikila bingi.

²¹⁸ Inge obewa wakonsha kutatula, mulongo, ne kulanguluka. Kaina, konka kuntendekelo yakyo, wajinga muntu wa bupopweshi bingi. Isao wajinga muntu wa bupopweshi bingi. Yudasa wajinga muntu wabupopweshi bingi. Ke bupopweshi. Kechi kiji pangye yantanda ne. Kijitu monka mukachi. Monai kyokyo, lufunjisho lwa bademona! Kapopo palutwe pacheche, kimye kimo, Nakonsha kuyako pabaya. Kimye kibena kupwa.

²¹⁹ Kuzhachisha nangwa umo ne. Temwai bantu bonse. Inge kechi mwakonsha kutemwa kufuma mu muchima ne, nachi Kilishitu kechi uji ne obewa ne.

²²⁰ Ku Toledo, Ohio, Natwelele mwakujiila mucheche. Amiwa najilanga pa kyokya kifulo, mpuzha icheche ya kwa Dunkard, mpuzha icheche yawama. Bajinga bawama bingi. Aa mabaanga bashikile, amba baye ku sukuulu wa Pamulungu. Kabiji byo baubile byobyo, Amiwa naile kubushiya bwa mukwakwa, ku kampuzha kacheche kakala ka muntanda, kabiji Naile monka. Kabiji Nayuka mba kechi kyaswishiwa ne kuta ngyuka mu Ohio. Kabiji kokwa kwaimene kapokola wa kyaalo wakumbata nsongwakazhi, kuboko kwanji kwakobamine papo pakyaji, kasa babena kuteya kimashinyi. Mizophilo ya makambi etu ne kyaalo, byonse byaya. Kyalusa!

²²¹ Naketekela pe Kilishitu Jiibwe ja nkosa, po Naimana, ponse pakwabo pabipa. Kafwako nangwa kintu kikwabo kyashalapo ne. Abyo ibyo.

²²² Natajile kunyuma kokwa, kabiji kwajinga inetu walamba wakyanyike, kapopo mu bwanyike bwanji, naitiini, eitiini, myaka naitiini. Kabiji kyo baubilenga, aba bansongwalume kunyuma kokwa ku tebulu, kyajinga kyakila kutama. Naikajile monka mwa. Kabiji kyakukumya, naikale ponkapa paishile kwikala inetu, waambile mba, "Musakukeba kipona nyi?"

Naambile mba, "Nakusachila. Amiwa nakebelenga kajo kakwiaula."

²²³ Kabiji waikele mu kipona, apo paikeli inetu mukulumpe, mukulumpe nobe bamaama, fifite-faivi, myaka fifite-eiti. Aye wamvvajile konka ka kimvwalo ka kacheche kavwajilo yabula bulesa.

²²⁴ Baamba mba kwatalala. Saayasi yamba mba, "Obewa wavundang'ana milanguluko." Kyakine, kechi ibyo ne. Obewa ukebatu kwimwesha mulekese. Kyabuvu, kya musebanya. Inetu kechi wakonsha kwibimvwala ne. Mwanamukazhi wakonsha, pakuuba inetu kechi wakonsha ne.

²²⁵ Kabiji pano, nanchi abo... wajinga byobya, waikele byobya. Mubiji wanji wajinga na misunyi yalela. Wajinga na yewa musango wa mwenkelo-yachiluluka, monse mo mwakonsha

kwikitongwela, pa mivumbo yanji. Kabiji wajinga pacheche na suki yo bachiba nobe mwanaamulume, yabula kumweka bulongo; byonka byaamba Baibolo, kyajinga kya musebanya. Kabiji mwanaamukzhi, awo mwanaamulume . . .

²²⁶ Aye Baibolo waamba mba, inge mwanaamukazhi watenda suki yanji, mwanaamulume uji na luusa lwa kumutulapo mu kwikana, mambo kechi uji na bukinshika nanji ne. Twafwainwa kufika ne kusapwila Baibolo muno amo moba. Waamba mba, “Inge wachiba suki yanji, nishi walengulula mulume wanji.” Inge waikala wabula mushingi, bafwainwa kumukana. Obewa kuba wasongola mukwabo ne, bino wakonsha kumukana. Yii! Mulunda, akyo, kyaikala kyakosa, Nakonsha kwikyumvwa. Bino kyo kya Bukine.

²²⁷ Oo, kyaikalanga mba, twajinga nakyo mu kibese kya Mupashi Wazhila, pakuuba twakokeshe mikambizho. Mulongo mukulumpe waambanga mba, “Tukokesha mizhilo, tukokesha mizhilo, twanekenene na bubi. Tukokesha mizhilo, mikoko yalupukamo, pano mikoko yatwelelemo byepi?” Mwakokeshe mizhilo. Akyo kyokyajinga lukayazho. Anweba mwakokeshe mizhilo, ntanda ne kipwilo bimvwanga pamo. Kijitu pamo nobe bena Muabo ne bakwabo, kabiji ne Balamu, kabiji byo basongwele mukachi kabo, akyo kijitu pamo ne buleelo. Kabiji kipwilo kyaonauka, kabiji nkulo ya Pentekosito kr nkulo ya Laondikeya, ayo ikala kyambazhi, kabiji ya laswamo mukanwa ka Lesa. Kabiji pa jibumba jonse, Lesa waitapo Banji bashalapo, wa musenda ku Nzubo Yanji, abyo kine ibyo, kyakine, kupichila mulusanguko.

²²⁸ Kabiji wajinga byobya, waikele byobya, wipetawila kilungi kyonse, kabiji kyajingaut ponse ponse. Kabiji wajinga bintu bifita pa meso anji, kabiji wasulwijilenga, masulwila apopolokelelenga. Kabiji awa muntu kamulanda wafwaijilwe kwikala na bakana. Kabiji waikele byobya na banabalume babiji bakulumpe, kabiji umo wajinga na kitambala kyabaya kyapombele mushingo yanji, kabiji kyajinga mu Kapyatoto, waikele popa. Kabiji mwanaamulume waimene, kabiji kyajinga nobe watomenenga, kabiji ne mwanaamukazhi naye watomenenga, ne aye. Kabiji wamukazhi wakeketelenga konse konse.

²²⁹ Nalangulukile namba, “Anweba Lesa! Lesa, kika Anweba kyakubujila kwikifumyapotu akyu kintu pa mapu? Kika Anweba kyo mwabujila? Bushe Sharon mucheche . . . Mwaanami mucheche, Sarah wami wamucheche ne Rebekah wamucheche bakakomena mu kyokya kisemi, kwiya na kukumanya bintu byamusango yewa?” Nalangulukile namba, “Talai mumwe mu bifulo mwakukaila ne bintutu, kabiji ne bibena kubiwa.” Nalangulukile namba, “Anweba Lesa! Oo, Amiwa njibingi nalusekelo Anweba mwamusendele Sharon inge kyajinga kyaswa muchima Wenu. Bushe Rebekah wami wamucheche

kabiji ne wamucheche—wamucheche Sarah bafwainwa kukomena mu bintu byamusango yewa?" Akyo, kabiji abo bantu betela mba...bemba mu jibumba ja banyimbi ne bintu byonse. Kabiji Nalangulukile mba, "Bushe akye kechi kyo kyabuvu nenyi?" Nalangulukile namba, "Lesa, bushe bololoke Bwenu Bwazhila bwakosha kwitabizha kyokya? Kyamweka nobe bukaji bwa bololoke Bwenu bwakonsha kwibafikila popa ne—ne konauna ino mpuzha."

²³⁰ Kabiji Naumvwine awa Malaika wa Nkambo, waamba mba, "Iya kulubaji." Naendele kuya konka. Kabiji byo Apwishishe ne amiwa, Naumvwine nobe muntu wapusanako. "Kika kyo ubena kumuzhachisha?"

Naambile mba, "Talai pa kyokya, mujishinda jo ajimo." Kabiji abyé Aye byo...

²³¹ Namwene mu kimwesho. Namwene ntanda nobe iji *bibye*, yazhokoloka, ntanda ikwabo. Pano iye ntanda *papo*, yajinga na kangongolo ke yizhokoloka, kabiji aa ajinga Mashi a kwa Kilishitu akikizha kubukaji bwa kwa Lesa. Aye kechi wakonsheshe kutala pa kyokyo ne, Aye—Aye wakonsha kwikyoonerna ponkapano, mambo Aye waambile mba, "Juba jo ukajako, aja juba jo ukafwa." Nanchi Aye wakonsha kwikyuba.

²³² Pano Amiwa nalangulukile kikye. Nemwene amiwa mwine. Nangwa Amiwa kechi naubile kyokyo ne, pakuuba Amiwa najinga ndengamambo, nangwa byonkabyo. Kabiji pano Mashi wa kwa Yesu Kilishitu oba kwi atweba nobe bukikizhi. Mwamona? Kya kuuba mba, inge Nauba bubi, bubi bwami bwamufikila Aye kabiji bwasukenya mutwe Wanji wawama, kabiji Nakonsheshe kumona mipolo ne Mashi kupopoloka. "Mulekelaitko mambo, Taata, aye kechi wayuka kyo abena kuuba ne." Kabiji inge Nauba kintu kikwabo kabiji Kyamufikila. "Mulekelaitko mambo, Taata."

²³³ Inge kyamupitaila Aye, Amiwa nafwainwa konaunwa. Kabiji inge Nabula kuswa lusa Lwanji, kabiji juba mweo wami byo akapitaila pa kyokya, Amiwa nishi nazhatwa kala. Amiwa nakana. Kafwako nangwa kimo kyashalako ne kanatu kuzhatwa. Wazhatwa, Amiwa nazhatwa kala. Lesa waambile mba, "Aja juba jo mukajako, aja juba jo mukafwa." Anweba mwazhatwa kala. Akye ke kipona kya buchibishi bwa mambo mabaanga ano, byubilo byobé kulubaji lwa Kilishitu.

²³⁴ Kabiji pano Nalangulukile mba, "Ee, abyé ibyo." Kabiji Namwene juba jimo Nakalabile kuya kwi Aye. Namwene buuku wami wakala walala byobya, ndengamambo, amwa mwajinga bintu byonse. Namwene bubi bwami bo bwikyubilenga, kabiji Naambile mba, "Nkambo, Anweba mwakonsha kundekelako mambo nyi?"

²³⁵ Watolele kuboko Kwanji ku lubaji Lwanji, wafumisheko Mashi amo, wanembele kukilang'anya peulu, ne kwamba mba,

“Alekelwa.” Wibutaile mu kalunga kakulubako, pakuuba mba akabule kwikivuluka jibiji. Kyaile myaka ne myaka! Aye waambile mba, “Amiwa nakulekela mambo, pakuuba obewa ubena ku muzhachisha.”

Akyu kyapipwile milanguluko yami. Naambile mba, “Nkambo, ngubilai lusa.”

²³⁶ Panyuma byo Nafumine mu kyokyo, Nayile konka na kwikala. Naambile mba, “Muji byepi, maama?”

Aye waambile mba, “Oo, alo.”

²³⁷ Kabiji Naambile mba, “Inge mwakonsha kundekelako mambo,” Naambile mba, “Amiwa ne Rev. Branham, wamwingilo.”

Waambile mba, “Oo, ndekelaiko mambo. Ndekelaiko mambo, Rev. Branham.”

²³⁸ Naambile mba, “Inetu.” Namubujile jishimikila. Naambile mba, “Najikwimana popa, kabiji Amiwa na kukuzhachishanga obewa, ne kulanguluka mba, ‘Ke kintu kyatama bingi!’ Kapepo obewa uji baana.”

Waambile mba, “Njinabo.”

²³⁹ Naambile mba, “Kika kyalengejile bintu kuya mungi?” Aye watatwile kulondolola jishimikila kwi amiwa ajo jakonsha kulengela muchima wa kintu kiji kyonse kulajika. Naambile mba, “Na—Nakwipuzhangna namba Lesa kika Aye kyo abujila konauna bya musango byobya kufuma pantanda. Kuno, obewa wajinga na baabo banabalume babiji bapendwa, kabiji ne obewa wapendwa, obewa mwine.” Kabiji Naambile mba, “Juba jimo... Aa Mashi abena kukanya bukaji bwa kwa Lesa kubula kufika pe obewa. Obewa juba jimo ukafwa. Kabiji, pano, obewa wi—obewa wi muttu wakasuluka kufukula kya kuuba, wakonsha kukana nangwa kuswa.” Naambile mba, “Bino juba jimo mweo obe ukapitaila kokwa, akwa lusa kafwako. Kabiji inge obewa wafwila mu bubi bobe, obewa nishi wazhatwa kala, kabiji obewa ubena kuya ku gehena.”

²⁴⁰ Anweba mwayuka kine kintu nyi? Awa mwanamukazhi wafumine pa kipona amwa mu nzubo ya kujilamo. Twajinga na pwijilo ya milombelo nobe kechi mwikyumvwapo mu bumi bwenu ne, kabiji aye waishile kwi Kilishitu. Kyajinga kika? Kechi mwibazhachishe n; babulai Mamboawama. Baji na bademona; ke mibiji ya bomi mu kikye kibese. Abo bongolwa kufuma kululwe lubaji. Bongozhi bwetu bufuma kwiulu. Twayai tumone byo twakonsha kuuba na mataleta etu, mu kuleta bakwabo kwi Kilishitu.

²⁴¹ Taata Wetu Wamwiulu, tubena kwimusachila Anweba pa buwame Bwenu ne lusa. Mundekeleko mambo, Nkambo; kapepo, bantu, Ne balama muno pa kimye kyabaya. Bino byo kiji ke kimye kyakupwisha kukwe kupwila mabaanga ano,

Nasaka kwibabula mba, “bademona,” kabiji Nakwibiyuzha byavula pantu pamo, mu lufunjisho lumo, bino kapepo bakonsha kwibitambula, apo ne popa, kabiji kwatakanyai byo Nalumbulula. Anweba mwayuka nkebelo ya muchima wami, ya kwibileta.

²⁴² Lekai bantu baye kufuma muno mabaanga ano, kabiji banabalume ne banabakazhi monai kintu kyonse kyoboba, bino ikalai basekela ne kukasuluka. Lekai bayuke mba Lesa wibapulusha. Kabiji lekai batale kwi Aye, lubaiko bintu byonse bileta mabamo ne bintu byonse byalamatako, kabiji ikalai mutende ne buwame, kabiji ne moyo wa kwakamwa Lesa. Kabiji pano, Lesa, inge Anweba mukeba kwibengijisha mu bintu byonse, Anweba mwakonsha kwamba kwi abo ne kwibatuma konse Anweba ko mwibakeba mba baye nangwa kiji kyonse Anweba kyo mwakeba mba boobe. Lekai bantu bekale bekepesha kabiji batane Kilishitu mu michima yabo. Tulekelaiko mambo, Nkambo, pa bilubo byetu, atweba bonse.

²⁴³ Kabiji twayuka mba—mba Satana ubena kwenda nobe bokwe ubuluma, konse konse, nakukeba ye asaka kuja, wawala mikukumba ya bupopweshi. Anweba Lesa, abo baana bacheche bakamulanda, talai pe abo, konse konse. Abo bakasululwa ne kuletwa patoka ku bantu. Kabiji Amiwa nemulomba Anweba, Lesa, kwibobila lusa, kabiji pulushai bonse balubilamo, bukai bakolwa. Kabiji, Lesa, twavuluka mba abo ba diabola bakala ba misongo babena kwiya pa baana Benu, amba Anweba nuji na mfuto yamambo iji kokwa, ya kwingijila pa bibye. Kabiji badiabola bonse bakonsha kwibalengela kulenga mambo, Anweba muji na mfuto ya mambo iji kokwa, ya kwingijila pa bibye. Kabiji Nalomba mba Anweba musa kuswisha mwi Yesu mu Jizhina. Amena.

Nakumya kana kokwa . . .



LUFUNJISHO LWA PA BADEMONA — KIBESE KYA BUPOPWESHI KDE53-0609A
(Demonology — Religious Realm)

LUFUNJISHO LWA PA BADEMONA LWALONDAKANA

Ino Mbila na Mulongo William Marrion Branham, yalupwilwe patanshi mu Kizungu pa Kibiji mute, 9 Kapyatoto, 1953, ku Roberts Park Amphitheater ku Connersville, Indiana, U.S.A., byafumishiwa pa tepu ukwata ne kufyatula kabiji bya nembwya mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org